

Carta de San Pablo a los ROMANOS

*Roma vāme cūti macana, Jesucristore
ajitirūnārē Pablo ī ucacōare queti*

¹ Yū ñaja Pablo vāme cūtigū adi quetire mūare ucacōagū. Jesucristo, ī bojasere yigū ñaja yū. Yūre besecōari, yūre cōacami Dios, “Yū macū sūori quēnaro yū yise quetire gājerāre gotimasiodirūcūja mū” yigū.

²⁻³ Adi quetire Jesucristo ī bajirotire quēnasere ucasūomasīñuma īna tirūmūanajū Diore gotirētobosariarā. To bajiri adigodojūre masūre bajiro rujū cūticōari ī ruyūare ti ñajare, tirūmūana ī bajirotire yirā īna ucariarore bajirone bajiyumi. To bajiri, “Ūjū David ñamasir'i jānami ñañumi”, ĩre yimasiaja mani. ⁴ To bajiri ī sīaecoro bero, Dios ī masise rāca ĩre catiocōari, “Ñajediro ūjū ñañā mū” ĩre ī yire ti ñajare, “Jesucristo mani ūjū, Dios macūne ñaami”, ĩre yimasiaja mani.

⁵ To bajiri Jesucristo sūori quēnaro yūre yigū, yūre goticudirotiyumi Dios, “Tocārāca sitana ī macū ī bajirere ajicōari, quēnaro ĩre ajitirūnūato” yigū. ⁶⁻⁷ To bajiri mūa quēne Roma ñarā, “Cristore ĩre ajitirūnūñā” Dios ī yirere cūdiriarā ñaja mūa, Jesús yarā. Mūare būto maiami Dios. Jesúsre ajitirūnārā ñari, Dios rīa ñañūja mūa. Mūare quēnarotigū, mani jacū Diore, to yicōari, mani ūjū Jesucristore, ado bajise mūare sēnibosaja yū:

“Quēnaro ĩna ñarotire yirã, ĩnare ejarēmoña”, mware yisēnibosaja yu.

Roma macanare Pablo ĩ ĩagũ varware queti

⁸ Ñaswose ado bajise mware gotiaja yu: Cristore ĩre mwa ajitirũnwsere gotirũgũama tocãrãca macariana. To bajiro ĩna yisere ajicõari, “Dios ĩ yise sworine Cristore ajitirũnrãma” yimasigũ ñari, “Quēnaro yaja mwa”, Diore ĩre yaja yu. ⁹ Tocãrãcaine Diore yu sēnijama, mware quēne sēnibosarũgũaja yu. Dios yure ĩ rotirore bajiro bato cudivariquēnaja yu. ĩ yirore bajiro cudigu ñari, ĩ macu swori quēnaro ĩ yise quetire goticudirũgũaja yu. To bajiri, masiami Dios, mware yu sēnibosasere. ¹⁰ Diore sēnigũ, “Mwa bojajama, no bojarirũmwa ĩnare ĩacudigu varwcuja yu”, ĩre yisēnirũgũaja yu. Mwa tujw varw, twõĩacõa ñarũgũboaja yu. ¹¹ “Bwtobusa Jesũre ajitirũnwato” yigu, mware ejarēmorwaja yu. ¹² Mwa quēne, yu quēne, “Bwtobusa ĩre ajitirũnrãsa mani” yigu, mani gãmerã ejarēmosere bojaja yu.

¹³ Cojosi me mwa tujwre yu varwarũgũboasere masiña mwa, yu mairã. “Gaje sitana yu gotisere ajicõari, Cristore ĩre ĩna ajitirũnwatore bajiro mwa rãcana quēne ajitirũnwato” yigu, varwarũgũboaja yu. Mwa ñarojwre varwa twõĩagũ ñaboarine, mwa tujwre vamasibeticajw yu. ¹⁴⁻¹⁵ Yu moare ñaja Jesucristo ĩ bajire sworine Dios quēnaro masare ĩ yisere gotimasiore. Griego ocare ñagõrãre quēne, ĩna mere quēne, quēnaro masirãre, masimenare quēne gotimasiroti ñaja yure. To bajigu ñari, Roma macajw ejacõari, mwa rãcanare quēne bato gotimasiornaja yu.

“Masa, Jesucristore ãre ajitirãñcõari, quẽnaseayere ãna bñajajare, tire gotibojonebeaja yñ”, Pablo ãyire queti

¹⁶ Jesucristo ã bajire sũorine masare quẽnaro Dios ã yise queti, quẽnase ñaja. Tire ajicõari, Jesucristore ãna ajitirãñajare, rojose ãna yise vaja rojose ãna tãmũotũjabetirotire ãnare yirẽtobosami Dios. Quẽnaro ã yise ñajare, ti quetire gotibojonebeaja yñ. Jud'io masa, ti quetire ajisũocajũ. Tijũ bero, ajisũyarũtuajama jud'io masa me quẽne. ¹⁷ Ado bajiro yaja ti queti: “ “ ‘Ñie rojose mana ñaama’ yato Dios” yigũ, yũre rijabosayumi Jesús’ yitũoĩarãre, ‘Ñie rojose mana ñaama’ ãnare yĩaami Dios”, yaja ti. Ìjũne to bajiro ã yire ñajare, to bajiro tũoĩaja mani. Tĩrene gotiaja Dios ocare masa ãna ucamasire. Ado bajiro gotiami Dios: “ ‘Ñie rojose magũ ñaami’ yñ yĩĩavariquẽnagũma, ‘Cristo sũorine Diorãca quẽnaro ñaja yñ’ yigũ ñari, ‘Ì rijato berojũ tudirijabeticõato ã’ yigũ, yñ catisere yñ ãsigũ ñarũcũmi ã ãgũma”, yigotiaja Dios ocare masa ãna ucamasire.

“Masa jediro rojose yirã ñaama”, Dios ã yĩĩase queti

¹⁸⁻¹⁹ “Ado bajiro ti bajijare, ‘Rojose mana ñaama’ Dios manire ã yĩĩasere bojaja mani jediro”, yigotimasiogũagũ yaja yñ. Dios ã rujeorere ãcõari, “To bajiro tũoĩagũ ñagũmi”, yimasiroti ñaja. To yicõari, “Masa rojose ãna yisere ãategũ ñaami”, ãre yimasiroti ñaja. “To bajiro tũoĩagũ ñagũmi” ãre yimasiroti ti ñaboajaquẽne, ãre rũcũbũobeticõari, rojose yirã ñari, gãjerã ãre ãna masirũaboasere “Ìre masibeticõaña” yirã yama. To bajiro ãna yijare,

rojose ñnare ï yijama, riojo yigũ yirũcũmi Dios. ²⁰ Ñabũjayamagũ ï ñaboajaquẽne, ï rujeorere ñacõari, “To bajiro yir’i ï ñajare, ï masisere masiaja’ yũre yato ñna” yigũ, adi macarũcũrore rujeomasiñũmi Dios. To bajiri, tire ñacõari, “Ñagũmi mani rẽtoro masigũ, adi macarũcũrojũre yirũjeosũor’i”, yire ñacoayuja. To bajiro yire ti ñacoadijare, “Diore masiña manicajũ ti”, yimasiña maja. To yicõari, “Dios ï bojabetire masibecũ ñari, no yũ bojarone yirũgũcajũ yũ”, yimasiña maja. ²¹ Tirũmũjũ, Diore masiboarine, quẽnaro ïre rũcũbũobetimasiñũjarã masa. Quẽnaro ñnare ï yiboajaquẽne, “Quẽnaro yaja mũ”, ïre yibetimasiñũjarã ñna. To bajiro bajirã ñari, socasejũare ajitirũnũcõari, Dios ï ñajama, rojose ti ñaboajaquẽne, “Quẽnasere yirã yaja mani”, yicoayuma ñna. ²² To bajiro bajica yirãne, “Bũto masirã ñaja yũ” yicõarã ñaboarine, ñamasusejũarema masiriticoayuma ñna. ²³ Dios rijabetirocũjũare ïre rũcũbũobeticõari, masa rijarona rujũre bajirojũa quẽnorũjeocõari, rũcũbũoyujarã ñna. To yicõari, vũrãre bajirã, vaibũcũrãre bajirã quẽnorũjeocõari, rũcũbũoyujarã ñna.

²⁴ To bajiri, ïre ñna ajitirũnũbetijare, “Rojose ñna yirũaro cõro yicõa ñnato ñna”, ñnare yicõañũju Dios. To bajiro ñnare ï yijare, bũtobũsa bojoneose yirũtuasujarã ñna. ²⁵ Dios yere ajitirũnũbeticõari, socasejũare ajitirũnũrũtuayujarã ñna. To yica yirã, Diore jediro rujeor’ijũare ïre rũcũbũobeticõari, ï rujeorejũare ñna masune quẽnorũjeocõari, rũcũbũoyujarã ñna. Diojũa ñnaami masa ñna rũcũbũo tũjabetirocũma. To bajirone bajimũorũgõato.

26 To bajiri gaje vāmejua rīne masa ĩna rŭcɔbɔocɔa űajare, “No ĩna bojaro yicɔa űato ĩna”, ĩnare yicɔaűuju Dios. Ado bajiro yirŭgŭűujarã ĩna: “Rŏmia, űmua rãca yiruarãma” Dios ĩ yiboarere yibeticɔari, rŏmia rīne gãmerã ajeriarã cutiyujarã ĩna. 27 Ŭmua quēne, “Rŏmia rãca yiruarãma” Dios ĩ yiboarere yibeticɔari, űmua rīne buto gãmerã yirɔacɔari, gãmerã yiyujarã ĩna. To bajiri ĩna rujariaye rãca bojoneose yirã ĩna űajare, rojose ĩnare yiyuju Dios.

28 ĩre ĩna ajibeti vaja, “No ĩna bojaro bajicɔato”, ĩnare yiyuju Dios. 29-31 Rojose ĩna yijama, ado bajiro yirŭgŭrãma: Jairo gajeyeŭni cɔorã űaboarine, jaibɔsaro bojarēmorã űarãma. Gãjerãre, “Yu rētobɔsaro quēnaro űaama”, yĭűajŭnisinirã űarãma. Gãjerãre sĩa, buto oca josajai, socajairã űa, bajirãma. Gãjerã rojose ĩna yirere ajicɔari, gãjerãre gotirudijairã űarãma. Masa ĩna ajiro rĭjorojua quēne, socarãne, “Ado bajise rojose yima”, yigotirãma. Diore ĩre terã űarãma. Gãjerãre tud'irã űarãma. “űamasurã űaja yua”, yijairã űarãma. Gãjerãma, “űamasurã űaja yua” yitɔoĭarã űaboarine, “To bajiro bajirã űaja yua”, yimenama. Rojose ĩna yirotire quēnaro yimasirã űarãma. ĩna jacuare ocarētorã űarãma. “Quēnase űaja. Rojose űaja”, yimasimena űarãma. ĩna gotirore bajiro yirã me űarãma. Gãjerã ĩna yarã ĩna űaboajaquēne, ĩnare ĩamaimena űarãma ĩna. Maioro bajirãre sutiritiĭamena űarãma ĩna. To bajiri, rojose jediro yirã űarãma. 32 To bajiro yirãrema, “‘Rojose ĩna yise vaja, rojose tãmɔotɔjabetiriaroju cɔarucɔja yu’ yiyumi Dios” yimasicɔarã űaboarine, rojose

yitujamenama. To yicōari, ĩna yirore bajiro gājerā ĩna yijama, rojose ĩna yisere ĩacōari, buto variquēnarāma ĩna.

2

“Rojose, quēnase masa ĩna yisere ĩabeserucami Dios”, yire

¹ “Rojose ĩna yise vaja Dios rojose ĩnare ĩ yijama, riojo yigũ yigũmi” yituoĩacōari, “Quēnarā ĩaja yua; yuarema rojose yibecumi” mua yituoĩaboajaquēne, “Yuare quēne, rojose yuare yato Dios” yirā yirāja mua. Rojose ĩna yirore bajirone rojose vaja mua quēne. To bajiri, “Rojose yimena ĩaja yua”, yimasimenaja mua. ² “Dios ĩaami, ‘Rojose ĩna yise vaja rojose tāmũoruarāma’ yĩamasigũma”, yimasiaja mani. ³ “Rojose ĩna yise vaja rojose ĩnare yirucami Dios” yicōari, “Rojose yibetirucami yuarema”, ¿yituoĩaboati mua, ĩnare bajiro rojose yirā ĩaboarine? ⁴ Rojose mua yise vaja guaro rojose mũare ĩ yibetijama, “Manire maigũ ĩari, rojose yibetirucami Dios”, ¿yituoĩaboati mua? To bajiro me bajiaja. Mũare ĩamaicōari, rojose mua yise vaja guaro rojose mũare yirũabeami Dios. Rojose mua yisere sutiriticōari, mua tuoĩavasoarotire bojaami. Rojose mua yisere “Yitujato” yigũ, mũare yugũ bajiami maji. ⁵⁻⁶ To bajiri rojose mua yise vaja rojose mũare ĩ yibetijare, “Rojose yirā yaja yua” yisutiritimena ĩari, rojose yitujabeaja mua. To bajiri, rojosere mua yicōa ĩarũgũjare, masare ĩ beserirũmu ti ejaro, rojose yirāre rojose tāmũotujabetiriaroju ĩ cōarotirũmu buto mũare jũnisinigũ ĩari, rojose mũare yirucami Dios. To

ĩ yijama, “Ĩ yirore bajiro yigu ñaami”, yimasire ñaruaroja. ⁷ Sīgũri quēnasere yitujamena ñaama ĩna. “Quēnaro yirũgũcaju mua’, manire yato ĩ Dios”, yituoĩarã ñaama. Dios taju ĩna ñarotire bojarã ñaama. To bajiro ĩna tuoĩajare, ĩna rijato beroju “Tudirijabeticõato” yigu, ĩ catisere ĩnare ĩsirucumi Dios. ⁸ Gãjerãjuma to bajise tuoĩarã me ñaama ĩna. ĩna bojarore bajiro tuoĩarã ñari, Diore ajimena ñaama ĩna. ĩre ajimena ñari, rojose yirũgũama ĩna. To bajiro ĩna yise ñajare, bũto jũnisiniami Dios. ĩnare jũnisinigũ ñari, masare ĩ beserirãmu ti ejaro, rojose tãmuotujabetiriaroju ĩnare cõarucumi. ⁹ Jud’io masa, jud’io masa me quēne, rojose yirãma, bũto rojose tãmuoruarãma ĩna. ¹⁰ Quēnasere yitujamenajumarema, “Quēnaro yirũgũcaju mua” ĩnare yicõari, “Yu rãca quēnaro ñaruarãja mua”, ĩnare yirucumi Dios. To bajiro yirucumi, jud’io masare, to yicõari jud’io masa mere quēne.

¹¹ Masare ĩ ĩabesejama, “Ãnoama rojose yirã ĩna ñaboajaquēne, ñamasurã ĩna ñajare, ĩnare quēnaro yirucuja yu” yigu me ñaami Dios. To bajiro yigu ñari, rojorãre rea, quēnarãre jua, yirucumi. ¹² Jud’io masa me ñarãre, Moisere Dios ĩ roticũmasirere cõomena ĩna ñaboajaquēne, rojose ĩna yise vaja rojose tãmuotujabetiriaroju ĩnare reacõarucumi. To yicõari, Moisere Dios ĩ roticũmasirere cõorãre quēne, tire cõorã ñaboarine ĩre ĩna cõdibeti vaja rojose tãmuotujabetiriaroju ĩnare reacõarucumi. ¹³ “Dios ĩ rotimasirere cõorã ñaja yu” yirã ñaboarine, ti rotirore bajiro ĩna cõdibetijama, ñie vaja maja. “Quēnase yirã ñaama”, ĩnare

yĩabetirucumi Dios. Ī rotimasire ti yiore bajiro cʉdirā rĩne ñaruarāma, “Quēnase yirā ñaama” ĩ yĩarā. ¹⁴ To bajiri jud'io masa me ñarā, Moisére Dios ĩ roticūmasirere masibetiboarine, quēnasere ĩna yijama, Dios ĩ rotimasirere ajicōari, cʉdirāre bajiro bajirāma, ĩ bojasere yirā ñari. To bajiro yirā, Dios ĩ ucarotimasirere cʉomena ñaboarine, rojose ĩna yisere masirāma, Dios ĩ masisere ĩnare ĩ cōase ti ñajare. ¹⁵ “Dios ĩ rotise ñaja ti” yimasimena ñaboarine, Dios ĩ bojasere masirāma ĩna. To bajiri rojose ĩna yijama, “Rojose yirā yaja yʉa”, yitʉoĩarāma. To yicōari, quēnasere ĩna yijama, “Quēnase yirā yaja yʉa”, yitʉoĩarāma. ¹⁶ To bajiro masa ĩna yitʉoĩarūgūse ñajare, masare ĩ beserirūmu ti ejaro Jesucristore cōarucumi Dios, masa jediro ĩna tʉoĩarūgūre ĩacōari, “ ‘Ado bajiro tʉoĩarā ñari, quēnase bujarā, rojose tāmʉorā, bajiruarāja mʉa’ ĩnare yato ĩ” yigʉ. To bajiro ĩ yiroti ti ñajare, Jesucristo manire ĩ rijabosare sʉorine Dios quēnaro ĩ yise quetire yʉ gotimasiojama, tire quēne gotirūgūaja yʉ.

“Moisére Dios ĩ roticūmasirere cʉdirā ñari, Dios yarā ñaja yʉa”, jud'io masa ĩna yire queti

¹⁷ Ado bajiro yitʉoĩaboarāja mʉa jud'io masa sīgāri: “Jud'io masa ñari, Moisés ñamasir'ire Dios ĩ roticūmasirere rācʉbʉoaja yʉa. To bajiri Dios yarā ñaja yʉa, rojose ĩ yibetirona”, yitʉoĩaboarāja mʉa. ¹⁸ Moisére Dios ĩ roticūmasirere cʉorā ñari, ĩ bojarore bajiro yirere masirāja. To yicōari, “Dios ĩ rotimasire masicōari, quēnasere yimasirā ñaja yʉa”, yirāja mʉa. ¹⁹⁻²⁰ To bajise yitʉoĩarā ñari,

ado bajiro tʉoĩaboarãja mʉa: “Dios yere masimenare gotimasiorimasa ñaja mani”, yiboarãja mʉa. “Rojose yirãre Dios ĩ bojasejʉare gotimasioaja mani. To bajiro mani yibetijama, rĩamasare bajiro tʉoĩacõa ñarʉarãma”, yitʉoĩaboarãja mʉa, “Dios rotimasirere cʉorã ñari, Dios ye jediro riojo masijeorã ñaja mani” yitʉoĩarã ñari. ²¹ To bajiri gãjerã masare gotimasioboarine, ¿mʉajʉama gãjerãre mʉa gotimasiorore bajiro yibeatı mʉa? Gãjerã masare, “Mʉa juarudijama, quẽnabeaja ti” yigotiboarine, mʉajʉama juarudirãja mʉa. ²² “Mʉa manajo me rãca, rõmia quêne mʉa manajʉ me rãca mʉa ajeriarã cʉtijama, quẽnabeaja ti” yirã ñaboarine, mʉajʉama, ¿no yirã tire yicõarũgũati mʉa? “Gãjerã masa, Diore masimena, ĩna masune ĩna quẽnoriarãjʉare rũcʉbʉosocarãma. To ĩna yisere ĩaterã ñaja yʉa” yigotiboarine, ¿no yirã ĩna yirũcʉbʉosocariviriayere ñasere juarudiati mʉa? ²³ “Moisere Dios ĩ roticũmasirere ñamasusere cʉoaja yʉa” yivariquẽnarã ñaboarine, ti rotirore bajiro yimenaja mʉa. To bajiro mʉa bajijama, Diore terã bajirãja mʉa. To bajiro mʉa bajisere ĩacõari, gãjerã masa quêne, ĩre terãma. ²⁴ Ti ũnire gotiaja Dios ocare masa ĩna ucamasire: “ ‘Dios yarã ñaja yʉa’ yigotirã ñaboarine, rojose yirũgũrãja mʉa. To bajiri Diore masimena quêne, ‘Rojosere quẽnaro yigũ ñagũmi Dios’ yitʉoĩaama ĩna”, yigotiaja Dios ocare masa ĩna ucamasire.

²⁵ Circuncisiõn yiecoriarã ñarãja mʉa. “ ‘Dios yarã ñaja yʉa. To bajiri ĩre cʉdirona ñaja yʉa’ yimasiritibeticõato ĩna” yigũ, to bajiro mani ñicʉare yirotimasĩnumi Dios. To bajiro Dios manire ĩ yirotimasire ti ñajare, ĩ rotimasire ñaro cõrone mani

cudijeocōajama, circuncisión mani yiecore, vaja cūtiboroja ti. To bajiboarine Dios ĩ rotimasire jediro cudijeomena ñari, circuncisión yiecobetiri-arāre bajirone bajicōaja mani. ²⁶ No bojarā, circuncisión yiecoyamana ĩna ñaboajaquēne, Dios ĩ roticūmasirere masibetiboarine, ti yirore bajiro ĩna yijama, “Y_u yarā ñaama”, yīāgūmi Dios. ²⁷ Jud'io masaj_uama, Dios ĩ rotimasire masa ĩna ucamasirere cūorā ñaboarine, to yicōari, circuncisión yiecoriarā ñaboarine, Diore quēnaro cūdimenaja m_ua. Gājerā masa circuncisión yiecobetiriarā ñaboarine, Dios ĩ roticūmasirere masibetiboarine, ti yirore bajiro yirā ñarāma. To bajiro bajirā ñari, m_uare jud'io masare ĩacōari, “Rojose yirā ñaama”, m_uare yīar_uarāma. ²⁸ Jud'io masa quēnase ĩna gotiboajaquēne, to yicōari quēnase ĩna yiboajaquēne tire ĩacōari, “Jud'io masa masu ñaama”, yīābeami Dios. Circuncisión yiecoriarā ĩna ñaboajaquēne, “Jud'io masa masu ñaama”, ĩnare yīābeami Dios. ²⁹ Dios ĩ ĩajama, Esp'iritu Santo ĩ ejarēmose rāca t_uoīarā rīne ñaama ĩ yarā, jud'io masa masuma.

3

¹ To bajiro y_u gotisere ajicōari, ado bajiro t_uoīarāja m_ua jud'io masa sīgūri: “No yirā, ‘Jud'io masa ñaja y_ua’ yimenaja mani. Jud'io masa mani ñajaquēne, ñie b_ujamenaja. Circuncisión yire quēne, ñie vaja manoja”, yit_uoīaboarāja m_ua. ² To bajiro me bajiaja. Cojo vāme me jud'io masare quēnaro yiyumi Dios. Ñas_uose ado bajiro m_uare gotiaja y_u: Mani ñic_uare ĩ ocare cūñumi Dios. “Quēnaro m_uare yir_uc_uja y_u”, ĩnare yimasiñumi Dios. Tire ajicōari, ado bajiro t_uoīarāja m_ua:

3 “Mani ñicua sīgūri Dios ĩ rotimasirere cūdimena ĩna ñajare, ‘Quēnaro ĩnare yirucuja yu’ Dios ĩ yiboarere yibetirucumi”, yituoĭaboarāja ma. “Diore ajitirūnarūgūruarāja” yirā ñaboarine, ĩna yirore bajiro yirā me ñaama masama. Diojuma, to bajiro bajigu me ñaami. “Quēnaro ĩnare yirucuja” yir’i ñari, ĩ yirore bajiro yirucumi. 4 Ado bajiro bajaiaja: Masa mani socaboajaquēne, Dioma, socagu me ñaami. Tirene ucamasĩnumi Diore gotirētobosarimasu:

“Mure yu cūdibeti vaja, rojose yare mu yiro ĩacōari, ‘Yirucuja’ ĩ yiriarore bajiro yami’ mure yirucubuo variquēnaruarāma masa. To bajiri, ‘Socagu ñaami’ mure yigu manirucumi”, yucamasĩnumi.

5 ĩ rotisere cūmasĩnumi Dios, mani ñicure. “Yu rotirore bajiro ma yibetijama, rojose mure yirucuja”, ĩnare yimasĩnumi. To bajiro ĩ yimasire ti ñaboajaquēne, ĩre ajibeticoayuma ĩna. To bajiri, jud’io masare, “Yu yarā ñaama”, yĩabeami Dios yuja. Jud’io masare, “Yu yarā me ñaama” ĩ yirere ajicōari, “Īre ĩna cūdibeti vaja, ‘Rojose’ yirucuja ĩ yiriarore bajirone yigu ñaami” yirā ñari, ĩre rucubuoama ĩna, jud’io masa me. To bajiri, jud’io masajuma, Dios mure rojose ĩ yisere masicōari, “Gājerā yare rucubuo variquēnato ĩna’ yigu, yu yarā me ñaama jud’io masama”, yigumi Dios. “To bajiro ĩ yijama, mani rāca rojose yigu, yigumi Dios”, ¿yituoĭati ma? 6 To bajiro me bajaiaja. Masa rojose ĩna yise vaja Dios rojose ĩnare ĩ yijama, vatojene rojose yigu me yami. To bajiri, masa rojose ĩna yisere ĩamasigū ñari, rojose ĩnare yirucumi Dios.

7 To bajiro mure yu gotisere ajicōari, ado

bajiro t̄uōarēmoboarãja m̄ua jud'io masa: “Dios ï rotimasirere c̄adijeobetiboarine, ï rotimasirere yirã ñaja mani. To bajiri rojosere mani yiboajaquēne, rojose manire yimasibeami Dios. Rojose mani yise vaja, rojose manire ï yijama, rojose manire ï yisere ïacōari, ‘ “To bajiro yir̄uc̄uja” ï yiriarore bajiro yiḡu yami Dios’ yïacōari, r̄uc̄ub̄uo variquēnar̄ar̄ama jud'io masa me ñarã”, yit̄uōiaboarãja m̄ua. ⁸ To bajiro me bajiaja. To bajiboarine, jud'io masare ȳu gotimasiosere ajicōari, s̄iḡuri ado bajiro ȳure ñagōmacarãma ïna: “ ‘Gãjerã, Diore r̄uc̄ub̄uo variquēnato ïna” yiḡu, rojose yito mani’ yiḡumi Pablo”, socarãne ȳure yïñagōmacarãma ïna. To bajiro yirãma, rojose t̄am̄uot̄ujabetiriarojū reacorã ñarãma.

“Mani jedirone rojose mani yise vaja, s̄uoye c̄utiaja mani”, yire

⁹ To bajiro m̄uare ȳu gotisere ajicōari, ¿ado bajiro yit̄uōiati m̄ua? “Dios manire ï ïajama, gãjerã masa r̄ëtoro quēnarã ñaja mani jud'io masa”, ¿yit̄uōiati m̄ua? To bajiro me bajiaja. Mani jud'io masa, jud'io masa me ñarã quēne, ñajediro rojose mani yise vaja s̄uoye c̄utiaja mani, Dios ï ïajama. ¹⁰ Tirene, ado bajiro gotiaja Dios ocare masa ïna ucamasire:

“Jediro m̄u rotirore bajiro c̄adiḡu maḡumi.

¹¹ ‘Adi ñaja quēnase. Tij̄ua ñaja rojose’ yimasimena r̄ĩne ñaama. ‘M̄u bojarore bajiro yir̄uc̄uja ȳu’ m̄ure yis̄eniḡu maḡumi.

¹² Masa jediro m̄u ocare ajir̄üḡũboariarã, tire ajit̄ujacōari, rojosej̄uare yirã ñarãma ïna.

Gãjerãre quẽnaro yirã manama. Quẽnasere yirã manimasucõarãma.

13-14 Ìna ñagõjama, masa yujeriagojerire jãna ãniorãre bajiro yama Ìna. Socajairã ñaama. Gãjerãre jũnisinicõari, Ìna tud'ijama, Ìna oca, ãña rĩma jũnisere bajiro budiaja.

15 Gãjerãre Ìna tud'ijũnisijama, guaro sãarã ñarãma.

16 Rojose yirã Ìna ñajare, Ìna vacudirijuri ñarãjua, rojose tãmuoama Ìna.

17 Gãjerã rãca quẽnaro ñarere masimena ñaama.

18 Diore gãimena ñari, Ìre rãcãbuomena ñarãma”, yigotiaja Dios ocare masa Ìna ucamasire.

19 Dios Ì rotimasirere, “Mani jud'io masare cũñumi, ‘Yu rotisere quẽnaro cãdiato Ìna’ yigu”, yimasiaja mani. To bajiri Dios Ì rotimasirere masiboarine tire yibeticõari, “Yuma suoye maja”, yimasiña maja. To bajiri, jud'io masa, jud'io masa me ñarã quẽne, “Dios ocare ti yirore bajirone, ‘Rojose yirã ñaja’ ”, yimasiaja mani. ²⁰ “Yu rotiro cõrone cãdijeogu ñaja mu’ yure yĩarãcãmi Dios”, yimasigũ magũmi. “Dios Ì rotimasire ñaro cõrone yijeomena ñari, suoye cãtiaja mani”, yimasiaja mani jediro.

“Jesucristo manire rijabosayumi” yitãoĩarãre, “Ñie rojose mana ñaama”, Dios Ì yĩare queti

²¹ To bajiro yirã ñaboarine, yucãrema ado bajirojua yimasiaja mani yuja: “Dios Ì rotimasire ñaro cõrone yijeomena ñaboarine, sĩgũrre, ‘Ñie rojose mana ñaama’ yĩaami Dios”, yimasiaja mani. Mani ñaja, Cristore ajitirũnrã ñari, “Ñie rojose mana ñaama” Dios Ì yĩarã. To bajiro manire Ì yiotire goti rĩjoro cãtiyuja, Moisére Dios Ì

roticũmasire, to yicõari, Diore gotirêtobosariarã ñna ucamasire quêne. ²²⁻²⁴ Ado bajiro bajiaja ti, Dios quênaro manire ñ yise: Dios ñ rotimasire ñnaro cõrone cudijeogũ magũmi. To bajiboarine mani jedirore maigũ ñnari, “Masa rojose ñna yise vaja ñnare vaja yibosaaya” yigũ, ñ macũre cõañumi Dios. Ñ macũ ñ rijabosare ti ñajare, rojose mani yisere manire masirioyumi Dios, Cristore ajitirũnarãre. To yigũ ñnari, “Ñie rojose mana ñnaama”, manire yĩaami Dios yuja. To bajiro bajiaja jud'io masare, jud'io masa me ñnarãre quêne. ²⁵ “Masa rojose yirãre rojose tãmũotũjabetiriaroju cõaroti ñaja” yir'i ñnari, “Rojose tãmũoroma” yigũ, Jesucristore ñ macũre cõañumi, ñajediro rojose yirãre ñnare rijabosarocũre. To bajiro ñ yire ñajare, masare rijabosayumi Jesús. Ñ ri'i rãca manire ñ vaja yibosare ti ñajare, rojose mani yisere masirioyumi. To ñ yijare, no bojagũ Jesúre ajitirũnũgũre, “Ñie rojose magũ ñnaami”, ñre yĩaami Dios. To bajiro ñ yijama, “Yirũcũja” ñ yirore bajiro yigũ yami. ²⁶ To bajiro yir'i ñnari, tirũmũanaju rojose ñna yisere ñaboarine, rojose ñna yise vajare rojose tãmũotũjabetiriaroju ñnare cõabesumi. To yicõari, yucũre quêne, “Rojose yirã ñaboarine, yũare rijabosayumi Jesucristo” yitũoĩarãre rojose tãmũotũjabetiriaroju ñnare cõabetirucũmi.

²⁷ To bajiri, “Dios ñ rotimasire ti yirore bajirone mani yijare, ‘Quênase yirã ñnaama’ manire yĩagũmi Dios”, yimasiña maja. Ado bajirojuã yire ñaja: “Jesucristo mani mũũ, manire ñ rijabosare ñajare, “Ñie rojose mana ñnaama” manire yĩagũmi Dios’ yirãjuare, ‘Ñie rojose mana ñnaama’ ñnare

yĩagũmi Dios”, yire ñaja. ²⁸ To bajiri, Moisére Dios ĩ roticũmasirere mani masiro cõro quẽnaro mani cãdiboajaquẽne, “Quẽnase yirã ñaama”, manire yĩabecũmi. “Jesucristo manire ĩ rijabosare ti ñajare, ñie rojose mana ñaja mani yuja” mani yisejuare masicõari, “Rojose mana ñaama”, manire yĩagũmi Dios.

²⁹ ¿Dioma, jud'io masa ɥju rĩne ñagũjarique? Bajigũmi, bajigũjuma. Bajicõari, jud'io masa me ñarã ɥju quẽne ñagũmi. ³⁰ Sĩgũne ñaami Dioma. Gãji magũmi. To bajiri circuncisión yiecoriarãre, yiecoyamanare quẽne, “Jesucristo manire ĩ rijabosare ti ñajare, ñie rojose mana ñaja mani yuja” mani yisere masicõari, “Rojose mana ñaama”, manire yĩagũmi Dios. ³¹ To bajiri, “Jesucristo ĩ rijabosare sũorine manire ĩavariquẽnaami Dios” mani yitũoĩajama, “Moisére Dios ĩ roticũmasirejuã vaja mano tujaroja”, yitũoĩarãja mũã sĩgũri. To bajiro me bajiaja. Moisére Dios ĩ roticũmasirere rearã me yirãja. “Jesucristo sũori manire ĩavariquẽnagũmi Dios” yimasirã ñari, tire yirẽmorã yirãja mani.

4

“Ñie rojose magũ ñaami Abraham’ yĩamasiñumi Dios”, yire

¹ Abraham, jud'io masa ñicũ ñamasir'ire ado bajise ĩ yijare, “Ñie rojose magũ ñaami” ĩre yĩamasiñumi Dios yire quetire mũare gotirũcũja yũ. ² Abraham quẽnaro ĩ yimasire ti ñaboajaquẽne, “Rojose magũ ñaami”, ĩre yibesuju Dios. “Rojose magũ ñaami” ĩre ĩ yijama, “Quẽnaro yigũ yũ ñajare, ‘Rojose magũ ñaami’ yũre yĩagũmi Dios”, yiborimi

Abraham. ³ Ado bajirojua gotiaja Dios ocare masa ñna ucamasire: “Abrahamre, ‘Quēnaro mure yirucuja yu’ Dios ñre ñ yisere ajicōari, ‘Ñie rojose magũ ñaami’ ñre yĩamasiñuju Dios”, yigotiaja ti, Dios ocare masa ñna ucamasire. ⁴ No bojagũ gājire ñ moabosajama, ñre ñ moabosase vaja ñre vaja yigũ, ñre ñsigũmi. ñre ñ moabosase vaja bñjacōari, “Vaja manone yure ñsigũ me yimi. ñre yu moabosase vajare yigũ, yure ñsimi”, yigũmi. ⁵ Tire bajiro me bajiaja ti, manire Diore ajitirũnarãre. “Dios ñ rotimasire ti yirore bajiro mani yise ñajare, ‘Ñie rojose mana ñaama’ manire yĩagũmi Dios”, yitũoĩabeaja. Ado bajirojua tũoĩarã ñaja mani: “Dios ñ bojarore bajiro yirã me mani ñaboajaquēne, quēnaro manire yigũmi. Rojose mani yisere ‘Manire masirioato Dios’ yigũ, manire vaja yibosayumi Jesús. To bajiro manire ñ yibosare ti ñajare, ‘Ñie rojose mana ñaama’ manire yĩagũmi Dios, yaja ti, ñ oca. To bajiro ti yijare, to bajirone bajiroja”, yitũoĩarã ñaja mani. To bajiro yitũoĩarãre, “Ñie rojose mana ñaama”, yĩagũmi Dios. ⁶ Tire tũoĩagũ, David ñamasir’i, ado bajiro ucamasiñumi: “Rojose ñna yisere tũoĩabecune, ‘Rojose mana ñaama’ ñnare yĩagũmi Dios, ñre ajitirũnarãre. To bajiro ñnare ñ yijare, variquēnarũarãma”, yiucamasiñumi David ñamasir’i. ⁷ Ado bajiro yiucamasiñumi ñ: “Variquēnarũarãma rojose ñna yisere Dios ñ masiriorã.

⁸ ‘Rojose mani yiro bero, manire masiriocōari, “Rojose yicajũ mna. To bajiri rojose

m̄are yir̄uc̄ja ȳu” tudiyibetir̄uc̄mi
Dios’ yit̄oĩar̄ãma, variquẽnar̄uar̄ãma”,
yiucomasiñumi David.

⁹ Variquẽnarere ti yijama, jud'io masa, circuncisión yiriarã r̄ine yiro me yaja. Circuncisión yiecoyamana jud'io masa mere quẽne yiro yaja. Abraham ï bajimasirere t̄oĩasaque m̄ua quẽna: Dios ãre ï gotimasirere, “Ï yirore bajirone bajir̄aroja” yiḡu ï ñajare, “Ñie rojose maḡũ ñaami”, ãre yĩamasiñuju Dios. ¹⁰ To bajiro ãre ï yijama, ¿circuncisión ï yiecoriaro beroj̄ua, ï yiecobetoj̄ua bajiyujarique? “Ñie rojose maḡũ ñaami” Abrahamre Dios ãre ï yijama, circuncisión ï yiecoroto r̄ĩjoroj̄une ãre yimasiñumi. ¹¹ Dios ãre ï gotimasirere, “Ï yirore bajirone bajir̄aroja” yiḡu ï ñajare, “Rojose maḡũ ñaami”, ãre yĩamasiñumi Dios. To yicõari bero, “To bajiro ãre ȳu yicatire masiritiromi” yiḡu, circuncisión ãre yirotimasiñuju, Abrahamre. To bajiri Abraham circuncisión ï yiecoroto r̄ĩjoroj̄une, “Rojose maḡũ ñaami”, ãre yĩamasiñuju Dios. To bajiro bajimasir'i ñari, jud'io masa ñic̄u r̄ine ñaḡu me bajimasíñumi Abraham ñamasir'ima. “Dios ï yiriarore bajirone bajir̄aroja” ï yit̄oĩamasiriarore bajirone yit̄oĩar̄ã ñna ñajare, “Ñie rojose mana ñaama” Dios ï yĩar̄ãre quẽne, ñna ñic̄une ñamasíñumi Abraham. ¹² Jud'io masa circuncisión yiecocõari, Abraham circuncisión yiecobec̄j̄u, “Dios ï yirore bajiro bajir̄aroja” ï yit̄oĩamasiriarore bajirone t̄oĩar̄ãre quẽne ñna ñic̄u ñamasíñumi Abraham.

“Cristore mani ajitir̄an̄jama, ‘Yir̄uc̄ja’ ï yiriarore bajirone yir̄uc̄mi Dios”, yire queti

13 “Mure, mu jānerabatiature quēne, adi macarucuro ti ñaro cōrone mure ujorucija yu”, yimasiñuju Dios, Abrahamre. “Yu rotisere quēnaro cūdiami” yigu me, to bajiro ĩre yimasiñuju Dios. Abrahamjua, “Yirucija’ Dios ĩ yiriarore bajirone bajiruroja” yituoīamasir’i ĩ ñajare, “Rojose magū ñaami” ĩre yīlagū ñari, to bajiro ĩre yimasiñuju Dios. 14 “Dios ĩ rotimasire ti yirore bajiro yirā rīne, macarucuro ti ñaro cōrone ujaruarāja” mani yituoīajama, Dios Abrahamre, “Mure, mu jānerabatiare quēne ujorucija yu” ĩ yimasiboarejuma vaja maniboroja. 15 “Dios ĩ roticūmasire ti yirore bajiro mani yijama, macarucuro ti ñaro cōrone ujaruarāja” mani yituoīajama, riojo gotirā me yirāja mani, Dios ĩ roticūmasire ñaro cōrone cūdijeomena ñari. “Macarucuro ujaruarāja” mani yituoīaboajaquēne, rojose manire yirucumi Dios, ĩ roticūmasirere cūdijeomena mani ñajare. “Dios ĩ roticūmasire mani cūdibetiboajaquēne, ‘Rojose mana ñaama’ yīlagūmi Dios” yituoīarā rīne ñaama “Rojose mana ñaama” Dios ĩ yīlarā.

16 To bajiri, “Ī yirore bajirone bajiruroja” ĩ yituoīase ñajare, Abrahamre ĩamaicōari, “Macarucuro jedirore mure ujorucija yu”, ĩre yimasiñuju Dios. To bajirone bajiaja manire quēne. Abraham Diore ĩ tuoīariarore bajiro Diore mani tuoīajama, manire quēne, “Abraham jānerabatia ñari, adi macarucuro jedirore ujaruarāja ma”, manire yīlagūmi Dios. To bajiri jud’io masa Moisére Dios ĩ roticūmasirere cūocōari, Abraham ĩ tuoīariarore bajirone ĩna tuoīajama, ĩnare quēne to bajirone yirucumi Dios. 17 Dios ocare masa ĩna

ucamasire quēne, to bajirone gotiaja: “Jājarā masa cojo sitana me ñarā ñicū ñarucūja mū yigotimasiñuju Dios, Abrahamre”, yigotiaja. To bajiro Dios ĩ yisere ajicōari, “Ī yirore bajirone bajiruroja”, ĩre yituoñamasiñuju Abraham. To bajiri, rijariarāre catiogū, to yicōari, ñajediro rujeomasir'i ñaami Dioma.

¹⁸ “Bucū ñari, rīa maniacū bajaiaja” Abraham ĩ yituoñaboajaquēne, “Jājarā ñaruarāma mū jānerabatia” Dios ĩre ĩ yijare, “Ī yirore bajirone bajiruroja”, yimasiñuju Abraham. “Bajirucūja mū” ĩ yiriarore bajirone yigū, jediro ñicū ñaami yuja. ¹⁹ Abraham, cien cūmari cōro tusacū ñamasiñuju. Ī manajo rāca, juarājune bucūrā ñari, rīa cutibetiariarājū ñamasiñujarā. To bajiri, “To cōro bajirearuarāja yūa” yimasibetiboarine, “Dios ĩ yirore bajirone bajiruroja”, yicōa ñagū ñamasiñuju Abraham. ²⁰ “‘Bajiruroja’ Dios yure ĩ yicati bajibetiruroja”, yibecū ñamasiñuju Abraham. To bajiro bajigū ñari, “Dios ĩ yirore bajirone yirucūmi” yigū ñari, “Socagū me ñaami Dios” ĩre yiajirūcūbūomasucoamasiñuju Abraham. To bajiri, “Mū yirore bajirone yigū ñaja mū”, Diore yivariquēnamasiñuju Abraham. ²¹ “Ī yirore bajirone yirucūmi. Ī yimasibeti manoja, Diorema”, yituoñamasiñuju. ²² “To bajiro yure tuoñagū ĩ ñajare, ‘Rojose magū ñaami’ ĩre yīñaja yū”, yimasiñuju Dios. To bajirone gotiaja ti, Dios ocare masa ĩna ucamasire.

²³ Abraham sīgūrene, “Rojose magū ñaami”, yuca ecobesuja Dios ocare masa ĩna ucamasire.

²⁴ Manire quēne, Abraham Diore ĩ tuoñamasiriarore

bajirone ĩre mani tũoĳajama, “Rojose mana ñaama”, yĩlagũmi Dios. ĩ ñaami mani uĳu Jesucristo ĩ rijato bero ĩre cator'ima. ²⁵ “Rojose ĩna yise vaja ĩnare vaja yibosaya” yigu, Jesucristore ĩre rijaroticõañumi Dios. To yicõari, Jesucristo ĩ rijato bero, “ ‘Rojose mana ñaama’ manire yĩlagũsa” yigu, ĩre tudicatoyumi quẽna.

5

Rojose mana mani bajise queti

¹⁻² To bajiri, “Rojose mani yise vaja manire vaja yibosayumi mani uĳu Jesucristo” mani yitũoĳasere masicõari, “Rojose mana ñaama”, manire yĩlagũmi Dios. To bajirã ñari, “Mani rijato beroĳu, ĩ rãca quẽnaro ñacõa ñarũgũruarãja”, yivariquẽnaja mani. To yicõari, “ ‘Yũre bajiro quẽnase rĩne yirã ñato’ yigu, manire yirẽmogũ yami”, yivariquẽnaja mani. ³ To bajiro yirã ñari, rojose tãmũoboarine, variquẽnaja mani. Tiaye rĩne variquẽnarã me yirãja mani. Rojose tãmũoboarine, “ ‘Jesucristo sũori Diorãca quẽnaro ñaja’ yitũoĳarã ñari, rojose yirũaboarine, tire yibeĳu yũa”, yimasiaja mani. ⁴ Cojoji me rojose tãmũorã ñaboarine, “Jesucristo sũori Diorãca quẽnaro ñaja” yitũoĳarã ñari, rojose yirũaboarine, tire yimena ñari, “ ĩ ñaroĳu ĩ rãca quẽnaro ñarũarãja”, yitũoĳañarũarãja mani. ⁵ Esp'iritu Santore manire cõañumi Dios. To bajiro ĩ yiriarã ñari, “Manire maiami Dios”, yimasiaja mani. To bajiri, “ ĩ ñaroĳu ĩ rãca ñabetirũarãja”, yisũtiritibetirũarãja mani.

⁶ Rojose yitũjamasimena mani ñajare, rojose mani yisere masiriorũ, ĩ macũre cõañumi Dios,

“Rojose ñna yise vaja, ñnare vaja yibosaya” yigu. ⁷ Josari ñaroja ti, gājire ñna sñaroadone, “Yujua ñre rijabosarucija” yirema. Dios ocare ajitirñugüre ñre ñna sñaroadijaquêne, ñre maigũ ñari, “Yujuare sñaña”, yimasigũ magũmi. To bajiboarine quênaro ñre yigu ñ ñajama, “Yujuare sñaña”, yimasibogumi, cojojirema. ⁸ Rojose yirã mani ñaboajaquêne, Jesucristojama manire rijabosayumi. To bajiri, “Manire buto maiami Dios”, yimasiaja mani. ⁹ Rojose yirã mani ñaboajaquêne, Jesucristo manire ñ rijabosare ti ñajare, “Rojose mana ñaama”, manire yĩaami Dios. To bajiri, “Rojose tãmotujabetiriaroju manire cõabetirucumi”, yimasiaja mani. ¹⁰ Rojose mani yisere ñategũ ñaboarine, tire masiriorũ, ñ macure manire cõañumi, “Ñnare rijabosaaya” yigu. To bajiri ñ macũ manire ñ rijabosaro bero ñre catiocõari, “Rojose mana ñaama”, manire yĩajũnisini tujayumi Dios. To bajiri, ado bajiro yimasiaja mani: “ ‘Dios tujũ ñ rãca quênaro ñato’ yigu, butobusa manire yirẽmorũgũrucumi Jesucristo”, ñre yivariquênaja mani. ¹¹ Ti rĩne yivariquêna tujamenane, “Jesucristo mani ujũ manire ñ rijabosare ñajare, Diorãca quênaro ñaja mani”, yivariquênaroti ñaja.

Adán ñ bajire, to yicõari, Jesucristo ñ bajire rãca Pablo gotire

¹² Adán ñamasĩñuju rojose yisũor'i. To bajiro ñ yimasire vaja rijacoamasĩñuju. To bajiro ñ yimasire ti ñajare, jedirone rojose yirã ñari, bajireacoayuja mani quêne. ¹³ Dios Moisére ñ roticũroto rĩjorojuñe, masa jediro rojose yimasĩñujarã ñna. To ñna yiboajaquêne, ñ roticũre ti manijare, “Yũ rotirore bajiro

yibeama ña”, yĩabetimasĩñuju Dios. ¹⁴ To bajiro ï yĩabetiboajaquẽne, Moisére ï roticũroto rĩjoroana quẽne bajireacoadimasĩñuma. To bajiro ña bajijama, Adán Dios ïre ï roticũsere masiboarine, ï cãdibetimasire vaja bajireasãoadimasĩñuma ña. To bajiri Adán manire ï yiromasire sũorine bajireacoarũgũaja mani quẽne. To bajiboarine, “Quẽnase yigũre ïre cõarũcũja yũ. ï sũorine quẽnaro ñarũarãma ña”, yimasĩñuju Dios.

¹⁵ Adán rojose ï yisũomasire vaja rojose manire ti ñaboajaquẽne, manire ïamaicõari, quẽnaro masu manire yirẽmoami Dios. To bajiri Adán sũorine “Rojose yirã ñaama” manire ï yĩare ti ñaboajaquẽne, yucũrema Jesucristo sũorine “Rojose mana ñaama”, manire yĩagũmi Dios. To yicõari, bũtobũsa quẽnaro manire yirẽmocõa ñagũmi Jesucristo, “Diorãca quẽnaro ñato” yigũ.

¹⁶ Adán, rẽmojũne rojose ï yisere ïacõari, “Mũ yise sũorine, mũ quẽne, mũ jãnerabatiajũ quẽne, bajireajedicõarũarãma”, yimasĩñuju Dios. To bajiro manire yimasir'i ñaboarine, yucũrema cojoji me rojose mani yise ti ñaboajaquẽne, tire masiriocõari, “Ñie rojose mana ñaama”, manire yĩagũmi Dios. ¹⁷ Sīgũ rojose ï yisũomasire sũorine masa jediro bajireacoayuja mani. To bajiro bajirã mani ñaboajaquẽne, Dios, masijeogũ ñari, manire ïamaicõari, quẽnaro masu manire ejarẽmogũmi. “Jesucristo manire rijabosayumi” yirãre, rojose mani yisere masiriocõari, “Rojose mana ñaama. Ña rijato berojũ ‘Tudirijabeticõato’ yigũ, yũ catisere ñare ïsirũcũja yũ”, manire yĩagũmi Dios.

¹⁸ Adán rojose ï yisũomasire sũorine, “Masa

jediro bajireacoaruarãma”, manire yimasiñuju Dios. To bajiro ï yimasire ti ñacõaboajaquêne, “Jesucristo yuare rijabosayumi” yirãre, “Ñie rojose mana ñaama. Ñna rijato beroju ‘Tudirijabeticõato’ yigũ, yu catisere ñnare ïsirucuja yu”, ñnare yigũmi Dios. ¹⁹ To bajiro yu yijama, ado bajiro yigũ yaja yu: Sīgũ Diore ï cõdibetimasire sũorine rojose yirã ñnacoayuja mani jediro, Dios ï ïajama. To bajiro bajiriarã ñnaboarine, Jesucristo, Dios ï rotirore bajirone ï cõdire sũorine, “Rojose mana ñaama” ï yĩarã jãjarã ñnarũtuaju mani yuja.

²⁰ Dios cũmasiñumi, ï roticũmasirere Moisés ñnamasir'i rãca, “ ï roticũriarore bajiro yibeticõari, rojose yijairã ñaja mani’ yimasiato ñna” yigũ. ï rotimasirere masiboarine, bũtobusa rojose yiyuma. To bajiro ñna yiboajaquêne, Diojũama, bũtobusa ñnare ïamaiñumi. ²¹ Rojose mani yise vaja, bajireacõari, rojose tãmũotũjabetiriaroju varona ñañuja mani. To bajirona mani ñnaboajaquêne, manire ïamaigũ ñari, mani ujuere Jesucristore cõañumi Dios, “Mũre ajitirãnarãre rojose ñna tãmũoborotire ñnare yirẽtobosaaya” yigũ. To bajiri Jesucristo manire ï rijabosare sũorine, “Rojose mana ñaama, manire yĩacõari, ñna rijato beroju ‘Tudirijabeticõato’ yigũ, yu catisere ñnare ïsirucuja yu”, manire yĩagũmi Dios.

6

“Rojose mani yisere yitũjacõari, Dios ï bojasejũare yirã ñato mani”, yire queti

¹ To bajiri Dios manire ï ñmaisere yu gotisere ajicõari, ¿no bajiro tũoĩati mũa? “Rojosere ñna

yiboajaquēne, rojose yigũ me ñañumi. To bajiri, butobusa rojose yito mani. To bajiro mani yiboajaquēne, manire maigũ ñari, manire masiriocõa ñarucumi”, ¿yitũõĩaboati mũa? ² ¡To bajiro me bajiaja! “Manire rijabosayumi” yitũõĩarã ñari, rojose yirũaboarine, tire yibetisũoyuja mani. To bajiro yiriarã ñaboarine, ¿no yirã rojosere tudiyirãjari mani? ³ ¿Bautizarere ajimasiati mũa? Oco rãca manire ñna bautizarone, “Cristore ajitirũnurã ñaja yũa” yirã, ado bajiro yiriarãja mani: “ “Rojose ñna yisere, tire yitũjato” yigũ, Cristo manire rijabosayumi’ yirã ñari, rojose mani yisere to cõrone yitũjato”, yiriarãja mani. ⁴ To bajiri rojose mani yisere yitũjarũarã ñari, oco rãca mani bautizarotirone, Jesucristo rãca rijanare bajiro bajiyuja mani. To bajicõari, Jesucristo ñ yuje ecoro bero, ñ masise rãca ñre tudicatoyumi Dios. To bajiri, ñ rãca tudicatirãre bajiro bajiyuja mani, bautismo mani yiecoro bero. To bajirã ñari, Jesucristo ñ ejarẽmose rãca Dios ñ bojarore bajiro yirã ñaja mani.

⁵ To bajiri, Jesucristo rãca rijariarãre bajiro bajirã ñari, tudicatir’i ñ ñajare, ñ rãca tudicatiriarãre bajiro bajirã ñari, ñ ejarẽmose rãca quẽnase yirũgũroti ñaja manire. ⁶ “Rojose mani yisere yitũjacõari, Jesucristojuare ñre ajitirũnũaja” yirãre, manire rijabosayumi Jesús, rojose mani yisere “Yitũjato” yigũ. To bajiro ñ bajire ti ñajare, rojosere yirũa tũõĩaboarine, tire yitũjaroti ñaja. ⁷ Masũ ñ bajirocacoajama, juaji rojose yibecumi. To bajiri mani quēne rojose yirũgũriarã ñaboarine, Jesũre ajitirũnũaca yirã, juaji rojose yibetiroti ñaja manire. ⁸⁻⁹ Mani quēne, Jesucristo rãca rijariarãre bajiro bajirã ñari, rojose yirũaboarine, tire yibetirũarãja.

“Jesucristo ĩ rijariaro bero tudicaticōari, ĵajji tudirijabetirucami” yimasirā ñari, “Ī ejarēmose rāca quēnase yicōa ñarūgūruarāja mani, adigodoĵu quēne, to yicōari, mani rijato beroĵu quēne”, yituoĵaja mani. ¹⁰ Jesucristo cojojine rijayumi, “Rojosere yitujacōari, quēnaseĵuare yato ĩna” yigū. To bajiri ĵajji tudirijabecami. Ī rijaro bero, tudicaticōari, yucurema ō vecaĵu ñacōari, Dios ĩ bojasere yiñagūmi. ¹¹ To bajiro tuoĵarūgūrōti ñaja manire quēne. “ ‘Quēnaseĵuare yato’ yigū manire ĩ rijabosare ti ñajare, rojosere yirūaboarine, tire yibetiruarāja. To bajicōari, Jesucristo ĩ ejarēmora ñari, Dios ĩ bojasere yicōa ñaruarāja mani quēne”, yituoĵarūgūrōti ñaja manire.

¹²⁻¹³ Mani ruĵu, yoaro catirotirujū me ñaja. To bajiri Dios ĩ bojabetire yiruarā ñaboarine, tire yibetiruarāja mani. “Rijacoaboarine, Jesucristo ĩ tudicatire ñajare, ĩ ejarēmose rāca Dios ĩ bojaseĵuare yiruarāja” yituoĵacōari, quēnaseĵuare yirā ñaruarāja mani. ¹⁴⁻¹⁵ “Dios Moisére ĩ roticūmasirere mani cūdibetijama, rojose tāmūotujabetiraroĵu manire cōarucami”, yituoĵa gūibetiroti ñaja manire. Dios, manire maigū ñari, ĩ macure cōañumi, rojose mani yise vajare, “Vaja yibosato” yigū. To bajiri, “ ‘Ñie rojose mana ñaama’ manire yīñagūmi Dios”, yaja mani. To bajiri, rojosere yirūaboarine, Jesucristo ĩ ejarēmose rāca rojose yibeaja mani.

“ ‘Rojose mana ñaama’ Dios ĩ yīñarā ñari, rojose mani yijama, quēnacōaroĵa”, ĵyituoĵati mūa? To bajiro me bajiaja. ¹⁶ “Rojosere yiruarā ñari, tire mani yicōa ñajama, ti rione yisejacoanaja mani”, ĵyimasibeati mūa? “To bajiro mani yijama rojose

tãmuotujabetiriaroju varuarãja mani”, çyimasibeati mua? “Tire yibeticõari, Dios ï bojarore bajirojua mani yicõa ñajama, ï bojasejuare yisejacoanaja mani”, çyimasibeati mua? ¹⁷ Tirãmujuma rojosere yisejariarã ñari, ti rione muare yiruamacõriaroja ti. To bajiri sîgã moarimasu cãticõari, ïre ï rotiajeriarore bajiro muare bajiriaroja rojosejua. To bajiro muare ti bajiboajaquẽne, ado bajisejua yituoïañuja mua yuja: “Jesucristo manire rijabosayumi, rojose mani yise sãori”, yituoïañuja mua. To bajiri yucurema Dios ï bojasere yirã ñarãja mua. Tire tuoïacõari, Dios sãorine to bajiro yirã mua ñajare, “Quẽnaro yaja mu”, ïre yaja yu. ¹⁸ Dios sãorine rojose yitujacõari, quẽnasejuare ï bojarore bajiro yirã ñarãja mua. ¹⁹ Moarimasu cãticõari, ï rotirere quẽnaro masirãja mua. To bajiri tire cõïacõari, muare gotibu yu. Tirãmujuma rojose yisejarã ñañuja mua. Yucurema ado bajiro Diore sãnirũgũña: “Mu bojase quẽnase rĩne yiruaja yua”, ïre yisãnirũgũña mua.

²⁰ Rojasere yirã ñaboarine, “Rojose yirã yaja yua”, yimasibetiriarãja mua. ²¹ Rojasere rĩne mua yijama, çdise ãni quẽnase bujacati mua? Bujabetiriarãja. Rojasere mua yirũgũrere mua tuoïajama, “Bojoneose yirã yiyuja mani”, yirãja mua. Rojasere rĩne mua yicõa ñajama, rojose tãmuotujabetiriaroju varona ñaboriarãja mua. ²² To bajiboarine, yucurema, Dios ï ejarẽmose rãca rojosere yitujacõari, ïre cãdirãja mua yuja. ïre cãdirã ñari, Dios ï ejarẽmose rãca butobusa ï bojasere yirũtuanaja mua. To bajicõari, mua rijato beroju tudicaticõari, ï rãca quẽnaro ñacõa ñarũgũruarãja mua. ²³ To bajiri, masa ro-

jose mani yise vaja mani rijato beroj_u rojose tã_uot_ujabetiriaroj_u varoti ñaja. To bajiboarine, Jesús yarã mani ñajama, rojose mani yise vaja, mani vaja yibetiboajaquêne, mani rijato beroj_u “Tudirijabeticõato” yig_u, ï catisere manire ïsiami Dios.

7

“Rojose mana ñarãsa’ yirã, Moisére Dios ï rotimasirere ajis_uyabetiroti ñaja”, yire queti

¹ Y_u mairã, Moisére Dios ï rotimasirere masirãja m_ua. Mani catiro cõro tire c_udire ñaja. Mani rija-coajama, tire c_udimasimenaja. ² Tire bajirivãme m_uare gotiaja y_u: Rõmio so manaj_u c_utijama, ï catiro cõro so manaj_u rãca so ñajama, quênaja. So manaj_u ï bajirocacoajama, “Gãjire manaj_u c_utibesa”, yibeaja Dios Moisére ï rotic_umasire. To bajiri so manaj_u ï bajirocaro bero, gãji so manaj_u c_utijama, Dios ï rotimasirere c_udibeco me bajigomo. ³ To bajiboarine, so manaj_u ï catirone, gãji rãca so ajeri c_utijama, “Rojose yigo yamo”, sore yĩare ñaroja. So manaj_u ï rijato beroj_u, gãji rãca so manaj_u c_utijama, Dios rotimasirere c_udibeco me yigomo. To bajiri, “Rojose yigo yamo”, sore yimasiña manaja.

⁴ Tire bajiro bajaiaja manire quêne. Cristo ï rijaroto rĩjoro, Dios ï rotimasirere mani c_udibeti vaja rojose tã_uot_ujabetiriaroj_u manire varoti ñaboayuja maji. To bajiboajaquêne, rojose mani yisere “Masirioato Dios” yig_u, manire rijabosayumi Cristo. Ìre ajitirãnarã, ï rãca rijariarãre bajiro bajaiaja mani. To

bajiri yucurema, “Dios ï rotimasirere mani c̄adibetijama, rojose t̄am̄ot̄ajabetiriaroju manire c̄ōaruc̄ami Dios”, yit̄ōiaḡuibetiroti ñaja manire. Cristo, mani yu ñaami. Ìre catioyumi Dios, “Yu macure ajitir̄un̄rã, yu bojarore bajiro yato” yiḡu. ⁵ Jesúre mani ajitir̄un̄roto r̄joroj̄ma, rojose r̄ine yirã ñar̄üḡñuja mani. Moisére Dios ï rotic̄umasirere masiboarine, ti yirore bajiro yir̄abesuja mani. To bajiri, rojose yisejarã ñari, ti rione manire yir̄amac̄õñuja ti. To bajiro yirã ñari, rojose t̄am̄ot̄ajabetiriaroju varona ñaboayuja mani maji. ⁶ Yucurema, “Moisére yu rotic̄uc̄atire c̄adijeoroti ñaja, yu t̄aju ña ñar̄ujama”, yit̄ōiabeami Dios. To bajiro ï yibetijare, “Dios ï rotimasirere mani c̄adibetijama, rojose t̄am̄ot̄ajabetiriaroju manire c̄ōaruc̄ami Dios”, yit̄ōiaḡuirã me ñaja mani yuja. To bajirã ñari, Esp̄iritu Santo ï ejar̄emose rãca Dios ï bojarore bajiro yirã ñaja mani.

Rojose mani yisere Pablo ï gotire queti

⁷ To bajiro m̄are yu gotisere ajic̄oari, ¿ado bajiro yit̄ōiati m̄a? “Dios, Moisére ï rotic̄umasire, ‘Rojose yiya m̄a’ manire yiro yaja”, ¿yit̄ōiati m̄a? To bajiro me bajiaja. “‘Rojose yirã ñaja mani’ yimasiato” yiro, yaja ti, Moisére Dios ï rotic̄umasire. Moisére ï rotic̄umasire ti manijama, “Rojose yirã ñaja mani”, yimasibetiboriarãja mani. Ado bajiro bajiaja: “Gãjerã ye gajeyeünire bojañabesa”, yigotiaja Dios ï rotic̄umasire. To bajiro ï yimasirere yu masibetijama, “Rojose yiḡu yaja”, yimasibetiboriaja yu. ⁸ “Bojañabesa” Dios ï yimasirere masic̄oari, “Yu bojañajama, rojose yiḡu

yaja” yimasiboarine, rojose yigũ ñari, butobusa gãjerã yere bojañarũtuacajũ yũ. Dios ã rotimasire ti manijama, “Rojose yigũ yaja yũ”, yimasire maniboriaroja. ⁹ Moisére ã roticũmasirere yũ masiroto rĩjorojũma, “Quẽnaro yigũ ñaja yũ”, yitũoĩaboacajũ yũ maji. “Bojañabesa” Dios ã yimasirere masicõari, “Yũ bojañajama, rojose yigũ yaja” yimasiboarine, butobusa gãjerã yere bojañarũtuacajũ yũ. To bajiri, “Dios ã ñajama, rojose tãmũotũjabetiriarojũ varocũ ñaja yũ”, yimasicajũ yũ yuja. ¹⁰ “Masa, yũ rãca quẽnaro ñato” yigũ, Moisére roticũmasiñumi Dios. To ã yimasire ti ñaboajaquẽne, “Tire yũ cũdibetijare, rojose tãmũotũjabetiriarojũ yũre cõarũcumĩ Dios”, yitũoĩacajũ yũ. ¹¹ “Gãjerã ye gajeyeũnire bojañabesa” yirere ajicõari, “Tire yũ cũdijama, ‘Quẽnaro yigũ ñaami’ yũre yĩarũcumĩ Dios”, yitũoĩacajũ yũ. To yitũoĩaboarine, gãjerã yere bojañacõa ñacajũ yũ. Tire yitũjabeccũ ñari, “Rojose tãmũotũjabetiriarojũ yũre cõarũcumĩ Dios”, yitũoĩacajũ yũ.

¹² To bajiri, Dios, Moisére ã roticũmasire, ñajediro riojo yise ñaja ti. To bajicõari quẽnase ñaja. ¹³ Tire ajicõari, Dios ã rotimasire quẽnase ti ñaboajaquẽne, “‘Ti sũorine rojose yirã ñari, rojose tãmũotũjabetiriarojũ varũarãma masa’, yigũ yami”, ¿yũre yitũoĩati mũa? To bajiro me yaja yũ. “Rojose ñna yise vaja rojose tãmũorũarãma” yigũjũna yaja yũ. “‘“Rojose masu yirã ñaja mani” yitũoĩamasiato’ yirojũna bajiyuja Dios ã rotimasirema”, yimasiaja mani.

¹⁴ Dios ã roticũmasire, quẽnase ti ñaboajaquẽne, rojosere yirũa tũoĩarã ñari, Dios ã bojabetijũare yaja mani. To bajiri, sĩgũ moarimasũ cũticõari,

ĩre ĩ rotiajerore bajiro manire bajiaja. ¹⁵ Mani bajisere ajimasibeaja mani. Quēnasere mani yir̥asej̥arema yibetir̥gũaja mani. To yic̥ari, “Rojose yibetir̥ar̥aja” mani yit̥oĩasej̥are yir̥gũaja mani. ¹⁶ “Mani yir̥gũsere yir̥abeaja” mani yit̥oĩajama, “Quēnase ñaja Dios ĩ rotimasire” yir̥a yaja mani. ¹⁷ “Mani yir̥gũsere yir̥abeaja” yir̥a ñaboarine, tire mani yijama, mani masune yir̥a me yaja mani. Rojosej̥a manire ũmato yir̥gũaja. ¹⁸ Quēnasere yir̥ar̥a ñaboarine, rojosej̥are yir̥gũaja mani. To bajiri, “Quēnasere yimasimena ñaja mani”, yimasiaja. ¹⁹ Quēnasere mani yir̥asej̥are yibetic̥ari, mani yir̥abeti rojosej̥are yir̥gũaja mani. ²⁰ To bajiri, “Mani yir̥gũsere yir̥abeaja” yir̥a ñaboarine, tire mani yijama, mani masune yir̥a me yaja mani. Rojosej̥a manire ũmato yir̥gũaja.

²¹⁻²³ Ado bajiro bajir̥gũaja manire: “Quēnasere yir̥ar̥aja” yir̥a ñaboarine, rojosej̥are yir̥gũaja mani. Dios ĩ rotimasire ti yirore bajiro mani yir̥ac̥oaboajaquēne, rojosej̥a manire ũmato ti yic̥a ñajare, rojosej̥are yir̥gũaja mani.

²⁴ To bajiri rojose yit̥ujamasimena ñari, rojose t̥am̥ot̥ujabetir̥iaroju mani varotire t̥oĩac̥ari, b̥uto s̥atiritiaja mani. “¿Ñim̥a manire yir̥ēmog̥uti, rojose yit̥ujac̥ari, Dios ĩ bojasej̥are mani yir̥gũrotire yig̥u?”, yis̥atiritiaja mani. ²⁵ To bajiro s̥atiritiboarine, “‘Rojose yit̥ujac̥ari, y̥a bojasej̥are yir̥a ñato ĩna’ yig̥u, mani ɸj̥ure Jesucristore ĩre c̥oañumi Dios”, yivariquēnaroti ñaja manire. To bajiri, “Quēnaro yaja m̥a”, Diore ĩre yivariquēnato mani.

To bajiri Dios ĩ bojarore bajiro mani yir_uaboajaquēne, rojosej_ua manire ũmato ti yicōa ñajare, rojosere yicōa ñaja mani.

8

*“Esp'iritu Santo ĩ ejarēmose rāca quēnasere yimasi-
aja mani”, yire queti*

¹⁻² Yuc_urema, “Y_u roticatore bajiro yibeama” Dios ĩ yīārā me ñaja mani. Jesucristo yarā ñari, “Rojose mana ñaama” ĩ yīārā ñaja. To bajicōari, rojose yir_uaboarine, Esp'iritu Santo ĩ ejarēmojare, rojosere yimena ñaja mani. To bajiri, rojose tām_uot_ujabetiriaroju vabetir_uarāja. ³ Ado bajiro bajiyuja manire: Dios Moisére ĩ roticūmasire ti yirore bajiro c_udijeomasibesuja mani, rojosej_uare yirā ñari. Mani c_udijeobetijare, rojose magū ĩ ñaboajaquēne, “Rojose yig_u ñaja m_u” ĩre yigure bajiro ĩ mac_ure rijaroticōañumi Dios, “Rojose ĩna yisere ĩnare vaja yibosaya” yig_u. Mani ruj_uare bajiro ruj_u c_utig_u ñaboarine, rojose yibec_u ñari, rojose mani yise vaja manire rijabosayumi. ⁴ To bajiro yiyumi Dios, “Y_u ejarēmose rāca y_u bojarore bajiro quēnase rīne yirā ñato” yig_u. To bajiri, rojosere yir_uarā ñaboarine, tire yibeaja mani. To yicōari, Esp'iritu Santo ĩ ejarēmose rāca t_uoīacōari, Dios ĩ bojarore bajiro yirūgūaja mani.

⁵ Rojose yirāma, rojose ĩna yirotire t_uoīarūgūrāma ĩna. Esp'iritu Santo ĩ bojarore bajiro yirāma, “Ī bojarore bajiro yirāsa” yirā t_uoīarūgūrāma. ⁶ Rojose yirāma, rojose tām_uot_ujabetiriaroju varona ñaama ĩna. Esp'iritu Santo ĩ bojarore bajiro yirāma, ĩna rijato beroju, Diorāca quēnaro ñacōa ñarūgūr_uarāma.

⁷ Rojose yirāma, Diore terā ñarāma ĩna. To bajirā ñari, ĩ bojarore bajiro yimasimenama. ⁸ To bajiro yirārema, ĩnare ĩavariquēnabeami Dios.

⁹ Mñajñama, rojose yirā me ñaja mña, Esp'iritu Santo mña rāca ĩ ñajare. Esp'iritu Santo ĩ bojarore bajiro yirā ñarāja mña. Esp'iritu Santore субесц, Jesucristo yñ me ñaami, ĩ ũgūma. ¹⁰ Rojose mñare ũmato yirirujñrima, boacoarñaroja. Boarotirujñri ti ñaboajaquēne, Cristo rācana mña ñajare, “Rojose mana ñaama”, mñare yĩñagūmi Dios. To bajiro mñare ĩ yĩñajare, ĩ rāca quēnaro ñarāja mña. ¹¹ Dione ñaami Jesús ĩ rijacoaboajaquēne, ĩre tudicator'ĩ. ĩre ĩ catioire ti ñajare, Esp'iritu Santore суборā ñaja mña. ĩre суборā mña ñajare, mña rijato berojñ Cristore ĩ catoriarore bajirone mñare quēne tudicatorñсцми Dios, jñaji boabetitirujññire mñare ĩsigñ.

¹² To bajiri yñ mairā, rojose yirñaboarine, tire yibetiroti ñaja mñare. ¹³ Rojose mña yĩñajama, mña rijato berojñ rojose tāmñotñjabetiriarojñ varñarāja mña. Rojose yirñaboarine, Esp'iritu Santo ĩ ejarēmose rāca rojosere mña yibetijama, mña rijato berojñ “Tudirijabeticōato” yigñ, ĩ catisere mñare ĩsirñсцми Dios.

¹⁴ Esp'iritu Santo ĩ ejarēmose rāca yirāma, Dios rñā ñarāma ĩna. ¹⁵ “Rojose mani yijare, rojose tāmñotñjabetiriarojñ manire cōarñсцми Dios' yigñiatio ĩna” yigñ me, manire ejarēmoami Esp'iritu Santo. ĩ суборine Dios rñā ñaja mani. To bajicōari, ĩ ejarēmose rāca, “Dios ĩ macñre ĩ maiore bajiro manire maiami” yitñoñarā ñari, “Cacñ”, yaja mani, Diore. ¹⁶ Esp'iritu Santo ĩ ejarēmose rāca,

“Dios rĩa ñaja”, yimasiaja mani. ¹⁷ To bajiri ĩ rĩa, Cristo yarã mani ñajare, ĩ macũre ĩ maiore bajirone manire maigũ ñari, manire quẽne quẽnaro yirũcũmi Dios. Adigodojũ, “Cristo ĩ bojasere yica” yirã, rojose mani tãmũojama, mani rijato bero Dios tũjũ quẽnaro ñarũgũrũarãja. ĩ macũ quẽnaro ĩ ñarore bajirone quẽnaro ñarũgũrũarãja mani quẽne.

Mani rijato bero, quẽnaro mani ñaroti queti

¹⁸ To bajiri adirũmũri, “¿No yirã rojose tãmũoati mani?”, yitũoĩa sũtiritibetiroti ñaja manire, rojose mani tãmũose rẽtoro quẽnaro Diorãca ñarona ñari. ¹⁹ Adi macarũcũro Dios ĩ rujeore jediro, Dios ĩ rĩare quẽnaro ĩ yirotirũmũ ti ejarore ĩarũaro bũto yuñaroja ti. ²⁰ Rẽmojũ Dios ĩ rujeorema, adirũmũri ti bajirone bajiro me bajimasĩnju. Adãn rojose ĩ yise ti ñajare, “Boase rĩne ñacõarũaroja” Dios ĩ yimasire ñari, adirũmũri ñase quẽne, boase rĩne ñacõaja. To bajiboarine, “Cojorũmũ adi macarũcũro ĩ rujeorere Dios ĩ tudiquẽnorotirũmũ ejarũaroja”, yimasiaja mani. ²¹ To bajiri ĩ rujeore jedirone “Boabeticõari, quẽnase rĩne ñato” yigũ, tudiquẽnorũcũmi quẽna. To yicõari, “Yũ rĩa quẽnase rĩne yirã ñato” yigũ, tudirijayamanire manire ĩsirũcũmi. ²² Adirũmũri quẽne Dios ĩ rujeore jedirone rojose tãmũocõa ñaja ti. Tire masiaja mani. Rõmio macũ cũtigoago, rojose so tãmũorore bajiro rojose tãmũoaja ti. ²³ Esp'iritu Santo ĩ ejarẽmorã ñaboarine, rojose yicõa ñarã ñari, rojose tãmũorũgũaja mani. To bajiri, “Quẽnase rĩne yirã ñato” yigũ, tudirijayamanire Dios manire ĩ ĩsrotire bojarã ñari, bũto tũoĩacõa ñarũgũaja

mani. ²⁴ “Tudirijayamanire ĩsirucumi”, yituoĩacõa ñarũgũaja mani, rojose mani yise vajare Jesús ĩ vaja yibosariarã ñari. Jẽre quẽnase rĩne yirã mani ñajama, tudirijayamanire manire ĩ ĩsirotire, no yirã yumenaja mani. ²⁵ Mani c̃obeti ti ñajare, quẽnaro tire yucõa ñarũgũroti ñaja.

²⁶ Esp'iritu Santo manire ejarẽmogũmi, “Rojose yirũaboarine, tire yibeticõato ĩna” yigũ. To yicõari, Diore mani sãnimasibetire masicõari, manire sãnibosarũgũgũmi, ĩ masise rãca. ²⁷ Dios ĩ bojarore bajiro manire sãnibosagũmi. To bajiri, Esp'iritu Santo manire ĩ sãnibosasere masigũmi Dios. ĩ ñaami mani tũoĩasere masigũma.

Cristore ajitirũnarã ñari, “Dios ĩ ejarẽmose rãca quẽnase rĩne yirã ñarũarãja mani”, yire queti

²⁸ Dios ĩ beseriarã ñari, ĩre maiaja mani. To bajiri, quẽnaro mani ñarotire yigũ, manire ĩ yirẽmorũgũsere masiaja mani. Rojose tãmuoaboarine, “Quẽnaro mani ñarotire yigũ, manire yirẽmogũmi”, yituoĩacõa ñaroti ñaja. ²⁹ Rẽmojũne Cristore ajitirũnarõnare manire masicõañumi Dios. “Yũ macũ Jesucristore bajiro quẽnase rĩne yirã ñarũarãma ĩna” yigũ. To bajiri, “Yũ bojarore bajiro yirãrema, ĩna gagũ ñarucumi Jesucristo”, yicõamasiñumi Dios. ³⁰ To bajiri rẽmojũne, “Cristore bajiro quẽnase rĩne yirã ñarũarãma” ĩ yiriarã ñaja mani. To bajiro manire yigũ ñari, “Rojosere yitũjacõari, ĩ macũre ajitirũnũato” yigũ, manire ejarẽmoñumi. To yicõari, ĩ macũre mani ajitirũnũjare, “Rojose mana ñaama”, manire yĩñañumi. To bajiri, ĩ macũ yarã mani

ñajare, “Íre bajiro quēnase rīne yirā ñato’ yigu, ñare ejarēmoraçaja”, yiyumi Dios.

³¹ Ti oca quēnasere masicōari, ado bajiro yirēmomasiaja mani: “Dios manire ejarēmoami, rojose tām̄ot̄ajabetiriaroju vabeticōato ña” yigu. Rojose gājerā manire ña yiboajaquēne, “Dios manire í ejarēmojare, no bajiro manire yimasimenama”, yimasiaja mani. ³² Í maigū í ñaboajaquēne, í mac̄ure íre cōañumi Dios, “Masare rijabosato” yigu. To bajiro yir’i ñari, quēnasere manire ejarēmocōa ñar̄uc̄umi Dios. ³³ To bajiri, í beseriarāre manire íamaicōari, “Rojose mana ñaama”, manire yīlagūmi Dios. To bajiro í yirā mani ñajare, “Rojose yirā ñaama”, manire yimasimenama. ³⁴ Rojose mani yise vaja, manire vaja yibosagu rijayumi Jesucristo. Tudicaticōari, Dios í rujiro riojojacat̄aj̄are rujicōari, manire ñagōbosarūgūgūmi. To bajiri, “Rojose yirā ñaama”, manire yibetir̄uc̄umi í quēne. ³⁵ Cristo manire í maisere, “¿No yigu ñare maiati?” yigu magūmi. Cojoji me rojose mani tām̄ooboajaquēne, gājerā rojose manire ña yiboajaquēne, ñiorijarā, sudi mana mani ñaboajaquēne, gūioroju mani vaboajaquēne, gājerā manire ña sīaboajaquēne, manire maicōa ñar̄uc̄umi Cristo. ³⁶ Tirām̄aju Dios ocare masa ña ucamasire mani bajisere gotiro, ado bajiro gotiaja ti:

“M̄u yarā ȳu ñajare, gājerā ȳuare sīarūgūama ña. Ovejare juaácōari, ña sīaroju juajacōari, ña sīarore bajiro ȳuare yirūgūama”, yigotiaja Dios oca.

³⁷ Ñajediro rojose mani tām̄ose ti ñaboajaquēne, manire í ejarēmocōa ñajare, “Manire b̄uto maicōa

ñaami”, yitujabetiruarãja mani. 38-39 Dios manire ï maisere matase manoja. Mani bajireacoajaquêne, mani ñacõajaquêne, manire maitujabetirucumi. Adirũmuri rojose mani tãmũose, to yicõari, gajerũmuri rojose mani tãmũoroti ti ñaboajaquêne, manire maitujabetirucumi Dios. Ángel mesa, vãtia, adigodo çjarã, õ vecana, õ eñerocana, ïañamana quêne, rojose manire ïna yiboajaquêne, manire ejarẽmocõa ñarucumi Dios, ï tujũ mani ejarotire yigũ. Jesucristo yarã mani ñajare, manire bũto maigũmi Dios.

9

Israel sitanare Dios ï besere queti

1-3 “Yũ yarã, Jesús ï bajirere ïna ajitejare, ï yarã me ñaama”, yisutiritiaja yũ. Ìre ajitirũnugũ ñari, Esp'iritu Santo ï ejarẽmose rãca, “Riojo gotiaja yũ”, yimasiaja yũ. Ìnare maigũ ñari, rojose ïna yise vaja ïnare vaja yibosagu, Cristore ïre cãmotadicõari, rojose tãmũotujabetiriaroju varũaboaja yũ; “To bajiro yũ bajise vajane, ïnajũa Cristo rãcana ñato” yigũ. 4 Yũ yarãre ado bajiro quẽnaro ïnare yiyumi Dios: Ìnare besecõari, “Yũ rĩa ñaja mũa”, ïnare yiyumi. To yicõari, ïañamagũ ñaboarine, ïañamani ïnare yiĩorũgũñumi, “Mani rãca ñagũmi” ïna yimasirotire yigũ. Moisés ñamasir'ire ï rotisere ïre cũmasiñumi. To yicõari, “Yũ bojasere mũa yijama, quẽnaro mũare yirucija yũ”, ïnare yimasiñumi. “Mũre, mũ jãnerabatiajũre quêne, adi macarucũro ti ñaro cõrone mũare çjorucija yũ”, ïnare yimasiñumi. 5 Yũ ñicũa, Diore rũcũbũorã ñamasiñujarã ïna. Ìna jãnamine ñañumi Cristo. Ìne ñagũmi Dios, ñajediro

ujɥ. Ī ñaami masa ĩna rŭcubɥo tujabetirocɥma. To bajirone bajimɥorŭgɔato.

⁶ Yɥ yarã israelita masare Dios oca quēnase ti gotiboajaquēne, “Quēnaro yirɥcɥja” ĩ yiriãrore bajiro ĩ yibetijama, “Socɥ yiyumi”, yitɥoĩarãja mɥa sĭgŭri. To bajiro me bajaiaja. Īre ajitirŭnrã rĭne ñarãma quēnaro ĩ yirona. Gãjerãma, israelita masa ñaboarine, Dios ĩ ĩajama, ĩ rĭa me ñarãma, ĩre ajitirŭnɥmena ñari. ⁷ Abraham jānerabatia ñaro cōrone, ĩ jānerabatia masu me ñarãma, Dios ĩ ĩajama. Ado bajiro Abrahamre gotimasiñuju Dios: “Mɥ macɥ Isaac rĭa ñaruarãma mɥ jānerabatia masuma”, yimasiñuju Dios. ⁸ To bajiro ti yijama, ado bajiro yiro yaja: “Quēnaro mɥre yirɥcɥja yɥ” ĩre ĩ yirere ajitirŭnrãjɥa ñaama Dios rĭa. ĩna roque, Abraham jānerabatia masu ñaama, Dios ĩ ĩajama. ⁹ Dios, ado bajiro ĩre yimasiñumi, Abrahamre: “Gaje cɥma ado cōrone mɥre ĩagŭ vadirɥcɥja yɥ quēna. To bajiri, tirodore mɥ manajo Sara, macɥ cŭtirɥocomo”, ĩre yigoti rĭjoro cŭtimasiñumi Dios.

¹⁰ Adi mɥare yɥ gotise rĭne ñabeaja. Abrahamre Dios ĩ gotiro bero, ĩ macɥ Isaac vãme cŭtigɥ, bɥcɥacɔari Rebecare manajo cŭtiyuju. Sore ĩ manajo cŭtiro bero, cojoji rĭa cŭtigone, jɥarã rĭa cŭtimasiñuju so. Esaú, Jacob vãme cŭtimasiñujarã. Jɥarãjɥne sĭgŭ rĭa ñaboarine, Dios ĩ ĩajama, Jacob sĭgŭne ñamasiñuju Abraham jānami masu. ¹¹⁻¹² ĩnare so rĭa cŭtiroto rĭjoro, ado bajiro sore gotimasiñuju Dios: “Mɥ macɥ cŭtisɥogɥ, ĩ bedire moabosarimasɥ ñarɥcɥmi”, sore yimasiñuju Dios, Rebecare. ĩna jɥarãjɥne, quēnasere, rojosere quēne ĩna yibetojɥne, to bajiro sore gotimasiñuju Dios. To

bajiro sore ĩ yimasire ti ñajare, ado bajiro yimasi-
aja mani: “Masa quēnasere ĩna yise sũori me, ĩ bo-
jarāre besegũmi Dios”, yimasiaja mani. ¹³ To bajiri,
Dios ocare masa ĩna ucamasire ado bajiro gotiaja:
“Jacobjũare ĩre maicõari, Esaũrema ĩre ĩatecaju yũ”,
yigotiaja Dios oca.

¹⁴ To bajiro ĩ yijama, “Rojose yigũ yigũmi Dios”,
yitũoĩaboarãja mũa. To bajiro me bajaiaja. ¹⁵ Ado
bajiro Moisére gotimasiñuju Dios: “Masa jediro
rojose yirã ĩna ñaboajaquēne, yũ bojarāre besecõari,
ĩnare ĩamairũcũja yũ”, ĩre yimasiñuju Dios, Moisére.
¹⁶ To bajiri, Dios manire ĩ ĩamairõtire mani sēnoro
me, manire ĩamaigũmi. To yicõari, “Quēnase mani
yise sũori manire besegũmi Dios”, yimasiña maja.
“ĩ bojarāre ĩamaicõari, besegũmi”, yimasire ñaja.
¹⁷ Egipto vāme cuti sitagũ ɱjũre Dios ĩre ĩ yiro-
tiro, Dios ocare masa ĩna ucamasire ado bajiro
yaja: “Ujũ mũre cũcaju yũ, ‘Yũre mũ ajirũabeti
sũori Egiptoanare rojose yũ yisere ĩacõari, “Masigũ
ñaami Dios” masa yũre yirũcũbũoato ĩna’ yigũ”,
yigotiaja Dios ocare masa ĩna ucamasire. ¹⁸ To
bajiro Dios ĩ yimasire ñajare, “ĩ bojarāre ĩamaicõari
quēnaro yigũ ñagũmi Dios”, yimasire ñaja. To
yicõari, “ĩre ajiterārema, ‘Bũtobũsa yũre ajiteato ĩna’
yigũ ñagũmi”, yimasire ñaja.

¹⁹ Tire ajicõari, ado bajiro tũoĩarãja mũa sīgũri:
“Dios ĩ yirũasere, ‘Tire yibeticõato’ yigũ magũmi.
ĩ manijare, ĩ bojarore bajiro yigũ ñari, rojose
mani yisere ĩacõari, ‘Rojose tãmũoũarãma ĩna’ Dios
ĩ yijama, rojose yigũ, yigũmi”, yitũoĩarãja mũa
sīgũri. ²⁰ To bajiro mũa tũoĩajama, ado bajiro mũare
cũdigũja yũ: Dios ĩ rujeoriarã ñari, “Rojose yũare

yaja m̄u”, ĩre yimasibeaja mani. Riri sot̄u quēne, “¿No yiḡu to bajiri sot̄u ȳare veari m̄u?”, yibetoja ti, ti sot̄ure vear'ire. ²¹ Riri sot̄uri ĩ veajama, ĩ vearūa t̄uōĩase cōro veaḡumi. Cojobur̄uaye ti ñaboajaquēne, “Ḡajer̄ã, ȳu veari sot̄ure ĩacōari, ‘Quēnase veamasiḡũ ñaami’ ȳare yĩĩato ĩna” yiḡu, quēnari sot̄u veaḡumi. Gajer̄urema, “Ȳu c̄uoroti sot̄u ñar̄uaroja” yiḡu, “Ado bajiri sot̄u ȳu veajama, quēnaja”, yiḡumi. “To bajirone manire yiḡumi Dios quēne”, yimasiaja mani.

²²⁻²³ To bajiro yiḡu ñari, jud'io masa rojose ĩna yise vaja rojose t̄am̄uot̄ujabetiriaroju ĩnare ĩ cōarūajama, cōamasiḡũ ñaboarine, ĩnare cōabesumi. ĩnare ĩ cōabetijama, ḡajer̄ãjūa, “Ȳu ocare ĩna ajitir̄ũñjare, ĩnare ĩamaicōari, ‘Rojose mana ñaama’ ĩnare yĩĩar̄uc̄uja” yiḡu, bajiyumi. To bajiri, jud'io masare rojose t̄am̄uot̄ujabetiriaroju ĩnare cōabetiboarine, rojose ĩna yijare, “Rojose t̄am̄uōña m̄ūa”, ĩnare yir̄ũḡũñumi, “‘J̄ūnisiniḡũ ñaami’ ȳare yimasiato” yiḡu.^a ²⁴ To bajiro yiḡu ñari, “Ȳure ajitir̄ũñato” yiḡu, manire beseyumi, jud'io masare, jud'io masa me ñar̄ãre quēne. ²⁵ Tirene gotiaja Dios ĩ yirere, Oseas ñamasir'i ĩ ucamasire:

“Ȳu yar̄ã merene, “Ȳu yar̄ã ñaama”, yir̄uc̄uja ȳu. Ȳu ĩamaibeticanare, “Ȳu ĩamair̄ã ñaama”, yir̄uc̄uja ȳu’, yami Dios.

²⁶ ‘Ȳu r̄ĩa me ñaama ĩna’ Dios ĩ yiriaro bero ti ñaboajaquēne, ‘Catim̄uor̄ũḡōḡũ Dios r̄ĩa ñaama ĩna’ yir̄uar̄ãma”, yiucamasiñuju Oseas ñamasir'i.

^a **9:22-23** Rojose t̄am̄uot̄ujabetiriaroju ĩnare cōabetiboarine, “Rojose t̄am̄uōña m̄ūa” ĩnare ĩ yijama, adi macar̄uc̄uro ñacōari, rojose ĩna t̄am̄uōñarotire yiḡu, yiyuju.

27 Isa'ias ñamasir'ijũama, ado bajiro Diore gotirētobosamasiñumi, manire jud'io masare tũoĩagũ: “Jud'io masa moa riaga jare bajiro jãjarã ñaboarine, mojoroaca ñaruarãma, ‘Rojose tãmũotũjabetiriaroju vabeticõato’ yigũ, yũ yirētobosarã. 28 Jãjarã masa, adigodoana, rojose ña yise vaja, ‘Rojose tãmũotũjabetiriaroju ñare cõarũcũja’ ĩ yiriarũmũ ti ejaro rēmone ñare cõarearũcumĩ”, yucamasiñuju Isa'ias. 29 Quēna gajeju ado bajiro ucamasiñuju Isa'ias, jud'io masa mani bajiro tire yigũ:

“Rojose ña tãmũoborotire sīgũrĩre Dios masijeogu ñare yirētobosabecũne, Sodomanare, Gomorranare, ĩ yiriarore bajiro ñare ĩ yireajeocõa tũjajama, mani jãnerabatia maniborãma”, yucamasiñuju Isa'ias, jud'io masa mani bajiro tire yigũ.

Cristore ajitirũnrãre, “Rojose mana ñaama” Dios ĩ yĩarere jud'io masa ña ajirũabeti queti

30 Tire tũoĩacõari, jud'io masa me ñarãre ado bajiro yimasiaja mani: “‘¿No bajiro yirãti mani, ‘Rojose mana ñaama’ Dios, manire ĩ yĩarotire yirã?’ yitũoĩabetiboarine, ‘Rojose mani yise vaja, manire rijabosayumi Cristo’ ña yitũoĩajare, ‘Rojose mana ñaama’ ñare yĩagũmi Dios”, yimasiaja mani. 31 To yicõari, jud'io masajũarema ado bajiro yimasiaja mani: “Dios ĩ rotimasire ti yirore bajiro mani yijama, ‘Quēnase yirã ñaama’ manire yĩarũcumĩ Dios”, yitũoĩaboayuma ña. To bajiro yitũoĩaboarine, ĩ rotimasire jediro ña cũdibetijare,

“Quēnase yirã ñaama”, ñnare yĩābesuju Dios, yimasiaja mani. ³² ¿No yirã to bajise bajiyujari ñna? “Jesucristo, manire ĩ rijabosare ti ññajare, manire ĩavariquēnagūmi Dios”, yibesuma. “Quēnaro mani yisere ĩacōari, ‘Quēnase yirã ñaama’ manire yĩāvariquēnarucūmi Dios”, yitūoĩaboayuma ñna. To bajiro yitūoĩarã ñnari, gūta jūatarāre bajiro bajiyuma.^b ³³ Ado bajiro yaja Dios oca, tire gotiro: “Sión vāme cūti macare gūta cūrucuja yū, masa ñna jūata quedirotiare. Tiare ajitirānūrāma, yū goticatore bajiro ñnare quēnaro yirucuja yū. To bajiro ñnare yū yijare, ‘Yirucuja’ ĩ yiriarore bajiro yigū ñnaami’ yirã, sūtiritibetirūarāma”.

10

¹ Ajiya mūa, yū mairā, Cristore ajitirānūrā. “Jud’io masa jediro rojose tāmūotūjabetiriaroju vatoma” yigū, Diore ñnare sēnibosarūgūaja yū. ² Ado bajiro ñna bajisere masiaja yū: Dios ĩ bojasere buto yirūaboama ñna. To bajiboarine, “Ti ñaja ĩ bojase”, yimasibeama. ³ “Rojose mani yisere Dios ĩ masirose vaja, manire vaja yibosayumi Cristo. To bajiri, Dios ĩ ĩajama, ‘Rojose mana ñaama’ manire yĩāgūmi”, yitūoĩabeama. “Ī rotimasirere mani cūdirjama, ‘Rojose mana ñaama’ manire yĩāarucūmi Dios”, yitūoĩaboama. To bajiro ñna yijama, Dios ĩ bojase yirã me yirāma. ⁴ “Cristo sūorine manire ĩavariquēnagūmi Dios” yitūoĩarārema, “Rojose mana ñaama”, yĩāgūmi Dios. “Yū roticatire cūdirã ñnari, rojose mana ñaama”, ñnare yibecūmi.

^b 9:32 “Gūtare jūatayuma” ti yijama, jud’io masa Jesucristore ñna ajiterere yiro yaja.

5 “Dios ĩ rotisere cadirãma, rojose mana ñaama” yigũ, ado bajiro ucamasiñumi Moisés ñamasir'i: “Dios ĩ roticatore bajirone cadirãma, Diorãca quẽnaro ñacõa ñarũgũrũarãma ĩna, adigodojũ, to yicõari, ĩna rijato berojũ quẽne”, yiucamasiñuju Moisés. 6 To ĩ yimasire ti ñaboajaquẽne, “Dios ĩ rotimasire ti yiore bajirone cadigũ magũmi”, yimasijaja mani. To yicõari, “Jesucristore masa ĩna ajitirũnũjama, ‘Rojose mana ñaama’ ĩnare yiĩagũmi Dios”, yimasijaja mani. To bajiro yirã ñari, “Dios ĩ ñarojũ ñagũre manire yirẽtobosarocure Cristore ĩre ãmirã varoti ñaja”, yitũoĩabetiroti ñaja, manire. 7 To yicõari, “Rijariarã ĩna ñarojũ ñagũre Cristore ĩre tudicatorã varoti ñaja”, yitũoĩabetiroti ñaja, manire. 8 “To bajiro tire yitũoĩamenane, ‘Dios ĩ yiriarore bajirone bajiyuja’ yitũoĩamasicõari, gãjerãre tire gotiya”, yigotijaja Dios oca. To bajiri, tĩrene masare ado bajiro gotimasiorũgũaja yũa: 9 “Jesús ĩ rijacoaboajaquẽne, ĩre tudicatioyumi Dios” yitũoĩacõari, “Jesús ñaami mani ɸjũ” mũa yigotijama, rojose tãmũotũjabetiriarojũ mani vaborotire manire yirẽtobosarũcũmi Dios, yigotimasiorũgũaja yũa. 10 Tire ĩnare yũa gotimasiojama, “Rojose mana ñaama” ĩnare yiĩacõari, rojose tãmũotũjabetiriarojũ ĩna vaborotire ĩnare yirẽtobosarũcũmi Dios yirã, ĩnare gotimasiorũgũaja.

11 To bajirone gotijaja Dios oca: “Jesúre ajitirũnũrãrema yũ goticatore bajiro ĩnare quẽnaro yũ yijare, ‘“Yirũcũja” ĩ yiriarore bajiro yigũ ñaami’ yirã, sũtiritibetirũarãma”, yigotijaja ti.

12 ĩna ɸjũ ñagũmi jud'io masare, jud'io masa

me ñarãre quêne. To bajiri, ãre sēnirãrema, quēnaro ñnare yigumi. ¹³ Tire gotiaja Dios ocare masa ñna ucamasire: “‘Rojose yua yise vaja rojose tãmuotujabetiriaroju yua varotire yuare yirētososaya’ ãre yisēnirãrema yirētososarucumi mani ujũ”, yigotiaja Dios ocare masa ñna ucamasire. ¹⁴ To bajiro ti gotiboajaquêne, “Dios ã cōar'i ñañumi” ñna yituoĩabetijama, no bajiro ãre yisēnimenama. To yicōari, Jesús ã bajire quetire ñna ajibetijama, no bajiro yimasicōari, “Dios ã cōar'i ñañumi”, ãre yimasimenama. No bajirojua yicōari tire masimenama ñna, ñimujane Jesús ã bajirere ñnare ã gotimasiobetijare. ¹⁵ “Jesús ã bajirere gotimasiocudiaya” ñimujane ñnare ã yiro cōro gotimasiocudirã vamenama. To bajiro yituoĩarãre ado bajiro gotiaja Dios ocare masa ñna ucamasirere: “Masare quēnaro Dios ã yise quetire gotimasiorã ñna ejasere bũto ãavariquēnaja mani”, yigotiaja ti.

¹⁶ To bajiro ti yiboajaquêne, jud'io masa Jesús ã bajire quetire ajirã jãjarã ñaboarine, mojoroaca ñaama ãre ajitirũnrãma. To bajiro ñna bajiro tire yigu, Isa'ias ñnamasir'i ado bajiro ucamasiñumi: “Yũ ujũ, yuare mũ gotimasiorotisere ajirũamena rĩne ñacōama”, yucamasiñumi Isa'ias. ¹⁷ To bajiri, Cristo ã bajirere ñna gotimasiosere ajicōari, “To bajirone bajirimi Cristo”, yituoĩare ñaja.

¹⁸ To bajiri, Jud'io masa, ¿Cristo ã bajirere ajibesujarique ñna? Ajiboayuma, bajirãjuma. Ado bajiro gotiaja Dios ocare masa ñna ucamasire: “Dios ocare gotimasiocudiyujarã ñna. To ñna yijare, Cristo ã bajirere ajijedicōañujarã”, yigotiaja Dios oca.

19 ¿Jud'io masa tire ajiboarine, quēnaro ajimasibesujarique? Ajimasiboayuma. “Ado bajiro bajiruarāma jud'io masa”, yigotiaja Moisés ĩ ucamasire:

“ “Dios ocare ajimasimena ñaama” mua yirāre, “Y_u yarā ñaja mua”, ĩnare yirucuja y_u. ĩnajuare quēnaro y_u yisere ĩacōari, ĩnare jūnisiniruarāja mua’ yami Dios”, yuucamasiñumi Moisés.

20 Isa'ias ñamasir'i quēne, güituoñari mene ado bajiro ucamasiñumi:

“ Y_ure macamenajua, y_ure bujaruarāma. “Diore masiruarāja” yituoñamenajua, y_ure masiruarāma’ yami Dios, jud'io masa me ñarāre tuoñagū”, yuucamasiñumi Isa'ias.

21 Jud'io masajuare Dios ĩ gotirere ado bajiro ucamasiñumi Isa'ias: “ Tocārācarūmane, “Y_u yarā mua ñasere bojaja y_u”, ĩnare yirūgūboacaju y_u. Y_ure cūdibeticōari, y_ure oca rētorūgūcama ĩna’ yami Dios”, yuucamasiñumi Isa'ias.

11

Israelita masare Dios ĩ ĩamaire queti

1 To bajiri, ¿ĩ yarāre jud'io masare ĩnare maitujacoasujari Dios? Bajibeaja. No yigū maitujabecumi. Y_u quēne, jud'io masu ñaja. Y_u ñicu ñasuoñ'i ñamasinuju Abraham. To bajiri, ĩ jānami ñamasir'i, Benjam'in ñamasir'i ya jūnagu ñaja y_u.

2 Tirūmuj_u, y_ua jud'io masare, “Y_u yarā ñaruarāja mua”, yimasiñumi Dios. To bajiro yir'i ñari, maitujabeami. El'ias ñamasir'i Diore ĩ sēnimasire masa ĩna ucamasirere ĩariarāja mua. “Jud'io masa

yu yarãre rojose ãna yise vaja rojose ãnare yiya” yigũ, ado bajiro yimasiñumi: ³ Yu ɛju, yũre ajiya. “Mũre gotirẽtobosarimasare sãajeocõama ãna. Mũre ãna rũcũbũorijurire quẽne reajeocõama ãna. Yu sãgũne, mũre rũcũbũogũma rũyaja yu. Yũre quẽne sãarũama”, Diore ãre yimasiñumi El'ias. ⁴ To bajiro ã yisere ajicõari, ado bajiro ãre cũdimasiñumi Dios: “Mu sãgũ me rũyaja. ‘Yu yarã ñaja mũa’ yu yirã, siete mil ñarirãcũ rũyaama, yũre rũcũbũorã, Baal vãme cutigure rũcũbũomena”, yimasiñumi Dios, El'ias ñamasir'ire. ⁵ Yucũrĩre quẽne sãgũrĩre jud'io masare yũare ãamaicõari, quẽnaro ã yire ñajare, “Yu yarã ñaja mũa” ã yirã ñaja yua. ⁶ Quẽnaro mani yibetiboaquẽne, manire ãamaicõari, quẽnaro ã yire ti ñajare, ã yarã ñaja mani. To bajiro ti bajijare, “Quẽnaro mani yise sũori me, ‘Yu yarã ñaama’ manire yĩãñumi Dios”, yimasiaja mani.

⁷ Ado bajiro bajiyuja jud'io masare: “Rojose mana ñaama” Dios ã yĩãsere ãna bojaboajaquẽne, Diojũama, “Rojose mana ñaama”, ãnare yĩãbesumi. To yibetiboarine, sãgũrĩre ãamaicõari, quẽnaro ã yire ti ñajare, “Rojose mana ñaama” ã yĩãrã ñari, ã yarã ñaja yua. Gãjerãrema, “Yũre ajiterã ñari, bũtobũsa yũre ajiterũarãma”, yiyumi Dios. ⁸ Tire gotiro, ado bajiro gotiaja Dios oca:

“ Yũre ajiterã ñari, bũtobũsa yu ocare ajimasibetirũarãma’ yirũcũmi Dios. To bajiro ã yijare, ã ocare masa ãna ucamasirere ãboarine, ajimasibetirũarãma. Gãjerã ã ocare ãna gotiboaquẽne, ajimasibetirũarãma ãna”, yigotiaja Dios oca.

Ë gotiriarore bajirone bajicõa ñaja ti, yu yarãre. ⁹⁻¹⁰ David ñamasir'i quẽne, ado bajiro ucamasiñumi,

Diore ĩ sēnigũ:

“Jud'io masa, boserũmũ yivariquēnaboarã, sutiritiatio, to yicōari, ajimasibetirũarãma ĩnare yiya. Rojose ĩna yise vaja rojose tãmuorũarãma ĩnare yiya. To yicōari rojose ĩna yise vaja, sīgũne buto rãcũsere juacōari, ĩ tãnivatore bajiro bajiatio ĩnare yiya”, Diore ĩre yisēnimasiñumi David.

Jud'io masa me ñarã, rojose ĩna yise vajare Dios ĩnare ĩyirētosare queti

11-12 To bajiri, ¿Jud'io masa Cristo ocare ĩna ajirũabeti vaja, “Yũ yarã me ñaja mũa”, ĩnare yicōa tũjasujari Dios? To bajiro me bajiaja. Jud'io masa jãjarã ĩre ĩna ajirũabetijare, jud'io masa me ñarãjũa Cristo ocare ajitirũnũñuma. ĩna ajitirũnũjare, rojose ĩna yise vaja rojose tãmuotũjabetiriaroju ĩna vaborotire ĩnare yirētosayumi. To bajiro ĩ yijama, “‘Quēnaro manire ĩ yiborere ĩnajuare quēnaro yigũmi Dios’ yitũoĩacōari, ‘Manire quēne quēnaro yato Dios’ yirã, yũre ajitirũnũato jud'io masa” yigũ, jud'io masa mere quēnaro yiyumi Dios. Jud'io masa quēne ĩna ajitirũnũjama, masa jedirore rētoro quēnaro yirũcũmi Dios.

13 Jud'io masa mejũare ado bajiro mũare gotiaja yũ: Mũare gotimasiorocare yũre cōacami Cristo. To bajiri, “Ti moare ñamasuse ñaja” yigũ ñari, yũ masiro cōro quēnaro gotimasiorũgũaja yũ. 14 Mũare yũ gotimasiojama, yũ yarã jud'io masa, mũare yũ gotimasiosere ajicōari, “‘Yũare ĩ gotiborotire ĩnajuare gotimasioami’ yirã ñari, ĩna quēne Cristore ajitirũnũato” yigũ, mũare gotimasioaja yũ. To bajiri, rojose ĩna yise vaja

rojose tãm uotujabetiriaroju ãna vaborotire ãnare yirëtobosarucami Dios. ¹⁵ Jud'io masa, Cristo ocare ãna ajirubetijare, jud'io masa mejure gotimasio-caju yua. To bajiri Cristo ocare ajitirũnarã ñari, adigodoju Diorãca quẽnaro ñaama ãna. Dios ã bo-jariarore bajiro jud'io masa quẽne, Cristo ocare ãna ajitirũnjama, rëtoro quẽnaruroja ti. Tudiri-jayamanire Dios ã catisere surã ñaruarãma. ¹⁶ Pan mani quẽnorotiburayere mojoriburaca ãmicõari, mani quẽnoricare, “Dios yaga ñaruroja” mani yijama, tiare quẽnoru mani juarure quẽne, Dios ye rĩne ñacõaroja, ã ãajama. Yucá ñemare, “Dios ya ma ñaruroja” mani yiboajaquẽne, tia rãjuri jedirone ã ye rĩne ñacõaroja. Abraham ñamasir'ire quẽne, “Yu yu ñaami”, ãre yĩamasĩnumi Dios. To bajiro ãre yir'i ñari, ã jãnerabatia jedirore, “Yu yarã ñaama”, ãnare yĩarucami Dios.

¹⁷ Tirũmujama, jud'io masa, olivo vãme cuti rãjure bajiro ñañuma. To bajiro ãna bajiboajaquẽne, tirũjure jatarocariarore bajiro ãnare yiyumi Dios, ãre ãna ajitirũnubeti vaja. Mua, jud'io masa mejua, no bojaricu yucá rãjure bajiro mua bajiboajaquẽne, Jesucristore mua ajitirũnuse surine ti rãjure jataãmiadicõari, olivo vãme cuti rãju ã jatarocariarũjure vasoagure bajiro yiyumi Dios. To bajiro ã yijama, “Sĩgũ rĩare bajiro bajirã ñaruarãma” yigu yiyumi. ¹⁸ To bajiri, jud'io masa suri Dios ye quẽnase burã ñari, jud'io masare, “Yu yarã me ñaama” ã yĩarãre ãatebesa mua. “Ëna rëtoro quẽnarã ñaja yua”, yitũõĩabesa. Ado bajirojua tũõĩãña: “‘Yu yarã ñaama’ manire ã yĩaroto rĩjorojua, jud'io masarema, ‘Mua suri masa jedirore quẽnaruroja

ti' ñnare yimasiñuju Dios", yituoñaña mña.

¹⁹ To bajiro mñare yñ yigotiboajaquēne, mña sīgūri ado bajiro tuoñarāja mña: "Yucá rñjuri ro-josere mani jasurerearore bajirone jud'io masare, 'Yñ yarā me ñaama' ñnare yīñañumi Dios, 'Gājerā masa yñ rña ñato' yigñ", yituoñarāja mña. To bajiro yituoñacōari, "Jud'io masa rētoro quēnarā ñaja mani", yituoñaboarāja mña. ²⁰ To bajiro tuoñarāre ado bajiro cñdiaja yñ: Diore ñna ajitirñnñbeti sñori, jud'io masare reayumi Dios. To bajiro ñnare yiboarine, mñajñare ñ yarāre bajiro mñare ñaami, ñre mña ajitirñnñse sñori. ñre mña ajitirñnñ sñyabeticōajama, ñ yarā me ñaborāja. To bajiri, "Jud'io masa rētoro ñamasurā ñaja", yituoñabeticōaña. Dioññare gñiya, "Yñare quēne rearomi" yirā. ²¹ Jud'io masa ñre ñna ajitirñnñ sñyabeti sñori, rojose ñna yire vaja ñnare masiribesumi Dios. Olivo rñjare ñnasñorirñjñ jatarocariarore bajiro ñnare yiyumi. To bajiri mña jud'io masa me ñarā quēne, ñre mña ajitirñnñ sñyabetijama, to bajirone yirñcñmi. ²² Diore mña teboajaquēne, mñare ñamaicōari, quēnaro ñ yirere, to yicōari, jud'io masa, Cristo ocare ñna ajitirñnñbeti vaja "Yñ yarā me ñaama" ñnare ñ yirere tuoñaña. Tire masirā ñari, "Cristore mani ajitirñnñ tñjajama, manire quēne, 'Yñ yarā me ñaama' yīñarñcñmi", yimasiña mña. ²³ Jud'io masa quēne, Cristo ocare ñna ajitirñnñjama, ñnare ñamaicōari, "Yñ yarā ñaja mña quēne", ñnare yīñarñcñmi Dios quēna. ²⁴ Jud'io masa me mña ñaboajaquēne, ñnare ñ yisñoriarore bajirone mñare ñamaicōari, "Yñ yarā ñaama", mñare yīñañumi. To bajiro ñ yire ñajare,

“Quēna ĩre ĩna ajitirũnũjama, josari mene, ‘Yũ yarã ñaama’ ĩnare yĩĩacõagũmi, jud'io masare”, yimasire ñaja.

Jud'io masa rojose ĩna yise vajare Dios ĩnare ĩ yirẽtobosaroti

²⁵ Yũ mairã, masa ĩna masibeticatire ado bajiro mũare gotiaja yũ: “ ‘Dios yarã ñari, yũa rĩne ñaja ĩ ocare quēnaro riojo ajimasirã’ yibeticõato” yigũ, adi ocare mũare gotiaja yũ: Adirũmũri jud'io masa jãjarã ñarãma Cristo ocare ajiterã. Jud'io masa me Cristore ĩna ajitirũnũjediro bero, jud'io masa quēne, Cristore ĩre ajitirũnũrũarãma ĩna. ²⁶ ĩna ajitirũnũjare, rojose ĩna yise vaja rojose ĩnare ĩ yĩborotire ĩnare yirẽtobosarũcũmi Dios. Tirene, ado bajiro gotiaja Dios ocare masa ĩna ucamasire:

“Sĩon vãme cũti macagũ ejarũcũmi, jud'io masa rojose ĩna yisere Dios ĩ masiriose vajare, ĩnare vaja yĩbosarocũ. Rojose ĩna yisere ĩ sũorine yĩtũjacõari, yũre ajitirũnũrũarãma quēna.

²⁷ Rojose ĩna yisere masiriocõari, yũ goticatore bajirone yĩrũcũja yũ”, yigotiaja Dios ocare masa ĩna ucamasire.^c

²⁸⁻²⁹ Cristo ĩ bajire sũorine quēnaro Dios ĩ yisere jud'io masa jãjarã ĩna ajirũabetijare, ĩnare ĩategũmi Dios. ĩna ajirũabetijare, jud'io masa mejũare mũare gotimasiocajũ yũa. To bajiboarine, jud'io masa ñicũa ñamasiriarãre, “Yũ rĩa, quēnaro yũ yirona ñarũarãja, mũa jãnerabatia quēne” ĩnare yir'i ñari, ĩnare maicõa ñagũmi Dios. To bajicõari, “Yĩrũcũja” ĩ yĩriarore bajirone yigũ ñari, Cristo ĩ bajirere ĩna ajitirũnũro, ĩnare quēne, “Yũ rĩa ñaama”, yĩĩarũcũmi.

^c 11:27 He 8.8-12. b

³⁰ Tirãmujuma Dios ocare ajiterã ñañuja mua maji. To bajiro bajiriarã mua ñaboajaquêne, jud'io masa Dios ocare ñna ajiruetijare, muaure ñamaicõari, rojose mua yise vaja rojose mua tãmuborotire mua yirëtobosayumi. ³¹ To bajiri yucurema jud'io masa ñaama Dios ocare ajiterã. To bajiro ñna bajiboajaquêne, muaure ñamaicõari, ñ yiriarore bajirone rojose ñna yise vaja rojose ñna tãmuborotire ñnare yirëtobosarucumi Dios. ³² Ado bajiro bajiyuja manire: Jud'io masare, ñna mere quêne, “Yũ bojarore bajiro yirã me ñaama”, manire yĩañumi Dios, “Manire rijabosayumi” Jesúre yitũoĩarãre ñamaicõari, quẽnaro ñ yiroti yigũ.

³³ Mani jedirore quẽnaro yigũ ñagũmi Dios. ¡Masijeogu ñagũmi! Ñre bajiro quẽnaro yigũ magũmi. Ñimujane, ñ tũoĩasere, to yicõari ñ yisere quêne masibecumi. ³⁴ Ado bajiro gotiaja Dios ocare masa ñna ucamasire: “Dios, mani mũ, ñ tũoĩasere masigũ magũmi. Ñre gotimasiogũ magũmi. ³⁵ ‘Quẽnaro mani yijare, Dios quêne quẽnaro manire yirocũ ñagũmi’ yimasibeaja mani”. ³⁶ “Quẽnase yũre yirũcũũo variquẽnato” yigũ, ñajedirore rujeomasiñumi Dios. To bajiro ñ yire ñaro cõrone cũogu ñagũmi. To bajiro bajigũ ñ ñajare, quẽnase ñre rũcũũo variquẽnatũjabetiroti ñaja, manire. To bajirone bajimũorũgõato.

12

“Dios ñ bojasere yirũgũũarãja mani”, yire queti

¹ To bajiri, yũ mairã, Dios manire ñ ñamaisere masirã ñari, ñ bojarore bajiro quẽnase rĩne yiroti ñaja. To bajiro mani yĩñajama, ñre rũcũũoã yirãja

mani. Tire ïavariquēnagūmi Dios. ² Adigodoaye rīne t̄uoīarā ïna t̄uoīarore bajiro t̄uoīabetiroti ñaja m̄uare. M̄uaj̄uama, Dios ï ejarēmose rāca ï bojasere yirūgūña. To bajiro m̄ua yijama, “Quēnasere, Dios ï ïavariquēnasere yirā yaja”, yimasiruarāja.

³ Ȳure ïamaicōari, quēnaro ȳure yiḡu, ȳure gotic-udirotiyumi Dios. To bajiri ado bajiro m̄uare gotiaja ȳu: “Mani masune Dios ï bojasere yimasija mani”, yit̄uoīabesa m̄ua. Ado bajiroj̄ua t̄uoīañna m̄ua: “Tocārāc̄ure ricatiri rīne mani yimasirotire ɯjoyumi Dios. To bajiri, ï ejarēmose rāca yiruarāja”, yit̄uoīañna m̄ua. ⁴ Mani ruj̄ure jairo ñaja. Āmo, cajea, gāmoro, ḡubo, gajeye quēne ñaja, cojo ruj̄u ñaboarine. Ricati rīne yaja. Cajea rāca ïa, gāmoro rāca aji, āmo rāca āmi, ḡubo rāca va, bajimasire ñaja manire. ⁵ To bajirone bajiaja Cristore ajitirūn̄urāre quēne. Jājarā ñaboarine, Cristore ajitirūn̄urā ñari, cojo ruj̄ure bajirone bajiaja mani. To bajicōari, cojo masare bajiro quēnaro gāmerā ejarēmorūgūaja mani.

⁶ Tocārāc̄ure ricati rīne ï bojarore bajiro mani yimasirotire manire ɯjoyumi Dios. To bajiri ï ɯjore mani yimasise rāca Cristore ajitirūn̄urāre ïnare ejarēmoroti ñaja. “Īnare ȳu gotisere ajicōari, gotirētobosarimasa ñato” yiḡu, ïna yimasirotire ïnare Dios ï ɯjore ti ñajama, “Tire manire ɯjoyumi” yit̄uoīacōari, gājerāre gotimasiroti ñaja. ⁷ “Gājerāre ejarēmoato” yiḡu, ïna yimasirotire Dios ï ɯjore ti ñajama, ïnare quēnaro ejarēmoroti ñaja. “Dios ocare ajimasicōari, gājerāre gotimasioato” yiḡu, ïnare ï ɯjore ti ñajama, “Tire manire ɯjoyumi” yit̄uoīacōari, quēnaro gotimasioroti ñaja. ⁸ “Ȳure ajitirūn̄urā

butoḅusa ajitirūnūato” yigū, ĩna gotimasiorotire ʉjoyumi Dios. Tire ʉjoecoriarāma, quēnaro gotimasioroti ñaja. Maioro bajirāre gājoa ĩsigūma, “To bajiro yʉ yise vaja yʉre ejarēmoruarāma ĩna” yitʉoĩagū me, ĩsiroti ñaja. Rotirārema, quēnaro rotiroti ñaja. Maioro bajirāre ejarēmorārema, variquēnase rāca ĩnare ejarēmoroti ñaja.

“Ado bajise ñaroti ñaja Cristore ajitirūnūrā”, yire queti

⁹ Socarāne, “Mʉare maiaja”, yitobesa. To yicōari, ĩnare mai, ĩnare ejarēmo, rojose yibeti, quēnase rĩne yirūgūña. ¹⁰ Cristore ajitirūnūrā ñari, sīgū rĩare bajiro bajiaja mʉa. To bajirā ñari, quēnaro gāmerā ĩamaicōari, rūcʉbʉoya, “ĩnaja ñaama ñamasurāma” gājerā ĩnare ĩna yĩarūcʉbʉorotire yirā.

¹¹ Dios ĩbojasere mʉa yijama, teyejairāne yibesa mʉa. Tocārācarūmʉne Dios mʉare ĩ ejarēmosere tʉoĩacōari, variquēnase rāca ĩ bojasere quēnaro yirūgūña.

¹² “Ō vecajʉ manire quēnaro yirʉcʉmi Dios” yimasirā ñari, quēnaro variquēnase rāca ñacōarūgūña mʉa. Rojose tāmʉoboarine, Diore ajitirūnūcōa ñarūgūña. ĩre ajitirūnūcōari, “Yʉare ejarēmoña”, ĩre yisēnitujabeja mʉa.

¹³ Cristore ajitirūnūrā rojose ĩna tāmʉojama, ĩnare ejarēmoña. Ejarāre quēnaro yiya.

¹⁴ Rojose mʉare yirāre, “Quēnaro ĩnare yato Dios” yirā, ĩnare sēnibosaya.

¹⁵ Gājerā quēnaro ĩna variquēnajama, ĩnare variquēnaejarēmoña. Gājerā ĩna sʉtiritijama, ĩnare sʉtiritiejarēmoña.

16 Gãjerã rãca cojo masare bajiro gãmerã Ìamaiña. “Ñamasurã ñaja yua”, yituoĩabesa. “Ñamasurã me ñaama” gãjerã Ìna yirãre baba cutiya mua. “Gãjerã rëtoro masirã ñaja yua”, yituoĩabesa.

17 Quënase rĩne yirũgũña mua, “Quënaro yirã ñaama” masa Ìna yĩarotire yirã. Rojose muare yirãre Ìnare gãmebesa mua. 18 Mua yimasiro cõro quënase rĩne yiya, “Masa jediro mani rãca quënaro ñato” yirã. 19 Gãjerã rojose muare Ìna yiboajaquëne, “Dios rĩne ñaami, masa rojose Ìna yise vaja, rojose Ìnare yirocũ” yirã ñari, rojose muare Ìna yijama, Ìnare yigãmebesa mua. Dios ocare masa Ìna ucamasire ado bajiro gotiaja: “Yũ ñaja, rojose Ìna yise vaja, Ìnare rojose yirocũ”, yigotiaja ti. 20 Gaje vãme, ado bajiro gotiaja, rojose manire yirãre Ìnare mani yirotire yiro: “Muare Ìategũ Ì ñiorijajama, bare Ìre ecaya. Ì idirũajama, Ìre ioya. To bajiro Ìre mua yijama, rojose muare Ì yisere tuoĩacõari, muare bũto bojonercũmi”, yigotiaja Dios oca. 21 Gãjerã rojose muare Ìna yijama, rojose Ìnare yicõarũaboarine, quënasejũare yicõa ñaña.

13

1 Dione ñagũmi masa ujarã ñaronare Ìnare cũrimasu. Ì cũriarã Ìna ñajare, Ìna rotirore bajiro quënaro yirũgũruarãja mua. 2 Dios Ì cũrãre cãdimenarema, Ìna cãdibeti vaja rojose Ìnare yirũcũmi Dios. 3 Quënase yirãrema gũiorã me ñaama ujarã. Rojose yirãjũarema gũiorã ñaama Ìna. To bajiri quënase rĩne yiya mua. Quënase rĩne mua yijama, “Quënaro yirã ñaama”, muare yĩarũarãma mua ujarã. 4 “Masa quënaro gãmerã

ejarẽmoato” yigũ, ɯjarãre cũgũmi Dios. To ã yiboajaquẽne, rojose mũa yijama, “Rojose yũa yise vaja rojose yũare yirũarãma ɯjarã” yimasirã ñari, ãnare gũirũarãja mũa. “Rojose yirãre rojose ãna yise vaja rojose yũre yibosato” yigũ, ãnare cũgũmi Dios. ⁵ “Rojose mani yise sũori rojose manire yiroma” yitũoĩarã ñari, ɯjarãre cũdirũgũrũarãja mũa. Tiaye rĩne, cũdirã me, Gajeye quẽne, “Mani cũdisere bojagũmi Dios” yirã ñari, cũdirũgũrũarãja. ⁶ Masa ɯjarã Diore moabosarũgũama, manire “Quẽnaro ñato” yirã. To bajiri manire ãna moabosase vaja ãnare vaja yiroti ñaja.

⁷ Mũa ɯjarã jedirore Dios ã bojarore bajirone quẽnaro ãnare yiroti ñaja. ãna vaja taro cõrone ãnare vaja yiya. “Gajeye moare ãna yise vajarẽ quẽne ãnare vaja yiya” mũare ãna yirore bajirone cũdirũarãja mũa. To yicõari, quẽnaro ãnare yirũcũbũoya.

⁸ Gãjerãre mũa vaja mojama, mũa vaja mosere vaja yiya. Mũa rãcanare ãamaiña. To bajiro mũa yijama, Dios ã rotise ñaro cõrone cũdirã yirãja. ⁹ Dios ã rotimasire ado bajiro gotiaja: “Manajo cũtirã, manajũ cũtirã, manajo mana, manajũ mana quẽne, gãjerã rãca ajeriarã cũtibesa. Siabesa. Juarudibesa. Gãjerã ye gajeyeũnire bojaĩabesa”, yigotiaja Dios ã rotimasire. To bajicõari, gajeye ñarẽmoaja Dios ã rotimasire. Tire cojo vãme mũare gotigũagũ yaja yũ. Cojo vãme ti ñaboajaquẽne, tire quẽnaro mani cũdijama, Dios ã rotise ñaro cõrone cũdirã yirãja mani. ã rotimasire ado bajiro yaja: “Mũ masu rujũre mũ mairore bajirone mũa rãcanare maiña”, yigotiaja Dios ã rotimasire.

¹⁰ Mani rãcanare mani maijama, rojose ñnare yime-naja. To bajiro mani yijama, Dios ñ rotise ñnaro cõrone cudirã yirãja mani.

¹¹ Tirãmujũ Cristo ñ bajirere ajisũorãjũne, “Tudiejacõari, quẽnaro manire yirũcumĩ”, yicõasũoyuja mani. To bajiri yucũrema, “Ñ tudiejarotirãmũ cõñadiaja” yimasirã ñnari, tire tũoĩatũjamenane, bũtobũsa Dios ñ bojarore bajiro yito mani. ¹² Cristo ñ ejarotirãmũ cõñacoajũ. To bajiri vãti ñ bojasere ñna yirirodori jedicoato yaja. To cõrone rojose yirãre rearũcumĩ Cristo. Tire masicõari, “Cristo manire ejarẽmoato” yirã, ñre sẽnito mani, “Rojose yirũaboarine, tire yibeticõari, ñ bojasejũare yirãsa mani” yirã. ¹³ To bajiro mani bajijama, quẽnase rĩne yirũarãja mani. Boserãmũri ñnaro idimecũcõari, avasãmecũcudirãre bajiro bajibetiroti ñnaja manire. Manajo cõtirã, manajũ cõtirã, manajo mana, manajũ mana quẽne, gãjerã rãca ajeriarã cõtibetiroti ñnaja. Gãmerã oca rõtobeticõato. Gãjerã ñna yisere ñajũnisinibeticõato mani. ¹⁴ Ado bajirojũa yirã ñnato mani: “Mani mũ Jesucristo manire ejarẽmoato” yirã, ñre sẽnirũgũto mani. Ñne ñagũmi manire ejarẽmogũ, “Rojose yiroma” yigũ. To bajiri ñ ejarẽmose ti ñnjare, rojose yirũaboarine, tire yibetirũarãja mani.

14

“Cristore ajitirũnrã ñnari, gãmerã ajirũcũbũoto mani”, yire

¹ “Cristo yũre ejarẽmogũmi” yitũoĩagũ ñnaboarine, tũoĩagũigũrema, quẽnaro ñre yiya. “Ado bajiro yiroti ñnaja” ñ yisere ajicõari, “Bajibeaja. Ado

bajirojma yiroti ñaja, mure”, ãre yi oca rētoresa.
² Sīgūri, Cristore ajitirūnā, “Bare vāme cuti ñaro cōrone mani bajama, quēnaja”, yitōiaama ña. Gājerāma, “Cristo manire ejarēmogūmi” yitōiarā ñaboarine, “Vaibucu rii mani bajama, quēnabetoja” yitōiagūicōari, bamenama ña. ³ Bare jediro barājma, “Mani bajama, quēnabetoja” yigūirāre, “Tōiāmasimena ñaja ma”, ñnare yibetiroti ñaja. Bamenajma quēne, jediro barāre, “Rojose yirā yaja ma”, ñnare yīñagōjaibesa, “Īna quēne, yu rīa ñaama” Dios ĩ yirā ña ñajare. ⁴ Cristore ajitirūnā, Dios ĩ rotirā ñaja mani. To bajiri sīgūri ña bajisere ĩacōari, “Quēnaro yaja ma. Ado yu rāca ñaña”, ñnare yirā ñaboarine, ricati tōiarārema, “Quēnaro yibeaja ma. Gajerojma vasa”, ñnare yibetiroti ñaja. Dios sīgūne ñaami ti ũnire yimasigūma. To yicōari ĩ rotirāre ejarēmogūmi, “Yu rāca ñacōa ñato ña” yigu. To bajiri ricati tōiarāre quēne, “Yu rāca ñacōa ñato”, ñnare yimasigūmi.

⁵ Sīgūri, Cristore ajitirūnā ado bajiro tōiaama ña: “Cojorūmne, gajerūmari rētoro ñamasurirūm Diore rūcūboriarūm ñaja”, yitōiaama. Gājerā Cristore ajitirūnā, ado bajiro tōiaama: “Tocārācarūmne Diore rūcūboroti ñaja”, yitōiaama ña. To bajiboarine ricati rīne ma tōiase, no yibeaja. Diore ma sēnise ñaja ñamasusema, “Ī bojasere yaja” ma yimasirotire yirā. ⁶ Sīgū ñagūmi, “Adirūm ñaja ñamasurirūm Diore rūcūboriarūm” yigu. Mani ũjre Diore rūcūbogūmi. Gājima, “Bare vāme cuti ñaro cōrone mani bajama, quēnaja” yigu ĩ bajama, “Quēnaro yaja ma”, Diore yigūmi. Gāji, vaibucu rii babecu

ñaboarine, gajeye bare bañagũne, “Quẽnaro yaja m̃”, Diore yirũcũbũogũmi ĩ quẽne.

7-9 Cristore ajitirũnarã, mani masune tũoĩacõari, yirã me ñaja mani. Ado bajiro bajaia: Siaecoboarine, tudicaticoasumi Cristo, ĩna catijaquẽne to yicõari ĩna rijacoajaquẽne, “Ĩna ɯjũ ñarũcũmi” Dios ĩ yijare. To bajiri adigodo mani catiñaro cõro, mani rijato berojũ quẽne, “Yũ masune rotiaja. Gãji yũre rotibeami”, yimasiña manoja. Cristo yarã ñari, mani rijato berojũ quẽne ĩ yarã ñacõa ñarũarãja mani. To bajiri, Cristo ĩ bojase rĩne yicõa ñaroti ñaja.

10 To bajiro ti bajiboajaquẽne, ¿no yirã, “Rojose yaja m̃”, m̃a yarãre ĩnare yiñagõjai coderũgũati? To yicõari, ¿no yirã m̃a yarãre, “Tũoĩamasimena ñaja m̃”, yĩateati m̃a? Mani ñaro cõrone, Dios ĩ ñarojũ ejarona ñaja mani. To bajiri, “Ãnoa ñaama quẽnase yicana. Ãnoa ñaama rojose yicana”, yĩabeserũcũmi. To bajiro ĩ yirotere masirã ñari, gãjerã Cristo yarãre, “Rojose yaja m̃”, yiñagõjaibesa. 11 Ado bajiro gotiaja Dios oca Isa'ias ĩ ucamasire:

“ Socũ me yaja yũ. Ado bajise bajirũaroja ti, masa jedirore: Yũ ĩaro rĩjorojũa yũre rũcũbũorã, gũsomuniari tuetucõari, “Masa ĩna yisere masigũ ñaja m̃”, yũre yirũarãma ĩna', yami mani ɯjũ”, yucamasiñũmi Isa'ias.

12 To bajiro ĩ yimasire ñajare, “Tocãrãcũne, ĩna yire jedirore Diore ĩre gotirũarãma ĩna”, yimasiaja mani.

13 To bajiri, “Rojose yaja m̃” gãmerã yiñagõjaibetirũarãja mani. Tire yibeticõari, “Mani rãcanare rojose ĩnare ũmato yirobe” yirã,

quēnase rīne yito mani. ¹⁴ Y_u, mani _uj_u Cristo ī gotimasiocatire ajicac_u ñari, ado bajiro yaja y_u: “Bare vāme cuti ñaro cōrone mani bajama, quēnaja”, yimasiaja y_u. To bajiro y_u yiboajaquēne, ñarāma gājerā Cristore ajitirūn_urā, “Vaib_uc_u rii y_u bajama, rojose yig_u, yig_uja y_u”, yit_uoīarāma. ¹⁵ “Vaib_uc_u rii y_u bajama, quēnabetoja” yig_u ñari, m_uaj_u tire m_ua baro ĩacōari sutiritig_umi. To bajiro ī bajisere masirā ñaboarine, m_ua bacōa ñajama, “M_ure maibeaja” yirāre bajiro yirāja m_ua. M_ua rī mere, gājerāre quēne rijabosag_u bajiyumi Cristo. To bajiri sīg_u, Cristore ajitirūn_ug_u, “Vaib_uc_u rii y_u bajama, rojose yig_u yaja” ī yisere ajicōari, vaib_uc_u riire babeja. “Mani basere ī bajama, ‘Rojose yig_u yaja y_u’ yit_uoīacōari, rojose tām_uot_ujabetiraroju vatomi” yirā, tire babetir_uarāja m_ua. ¹⁶ To bajiri, “Mani yise quēnase ti ñaboajaquēne, tire ĩacōari, ‘Rojose yirā yama’ gājerā manire yīarāma” m_ua yimasijama, tire yibeticōaña. ¹⁷ Mani barotire, mani idirotire b_uto t_uoīaroti me ñaja. Mani _uj_u ī bojarore bajiro quēnaro mani yisej_uare t_uoīaroti ñaja. To yicōari, Esp'iritu Santo manire ī ejarēmose s_uorine gājerā mani rāca quēnaro ĩna variquēnarotij_uare t_uoīaroti ñaja, manire. ¹⁸ Esp'iritu Santo ī ejarēmose s_uorine Cristo ī bojarore bajiro quēnaro mani yijama, “Quēnaro yirā ñaama”, manire yīavariquēnag_umi Dios. To bajicōari, masa quēne, “Quēnaro yirā ñaama”, manire yīar_uarāma ĩna.

¹⁹ To bajiri b_utob_usa ī bojarore bajiro mani yijama, gāmerā ejarēm_urā yirāja mani, “Jediro Cristo ī bojarore bajiro yirā ñarāsa mani” yirā. ²⁰ To bajiri sīg_u, Cristore ajitirūn_ug_u, m_ua baroti ñaboasere

ĭacđari, “Babetiroti ñaja” ĭ yijama, tire babe-
 tiruarāja m̄ua. “Mani basere ĭ bajama, ‘Rojose yiḡu
 yaja yu’ yit̄uoĭacđari, rojose t̄am̄uot̄ujabetiriaroju
 vatomi” yirā, tire babetiruarāja m̄ua. Mani base
 jediro quēnase rīne ñacđaja. To bajiboarine mani
 rācagu Cristore ajitir̄anuḡū, “Vaibucu rii yu bajama,
 rojose yiḡu yaja” ĭ yiĭasere, mani bajama, rojose ĭre
 yirorāre bajiro yirāja mani. ²¹ Mani rācagu Cristo
 yu, m̄ua basere, uye oco m̄ua idise, to yicđari, gaj-
 eye no bojase m̄ua yisere ĭacđari, ĭ quēne ĭ yijama,
 “Rojose yiḡu yaja”, yit̄uoĭaḡūmi. To bajiro t̄uoĭaḡū
 ĭ ñajare, to bajiro m̄ua yijama, rojose ĭre yirorāre
 bajiro yirāja m̄ua. ²² To bajiri, “Bare vāme cuti
 ñaro cōrone mani bajama, quēnaja”, “Mani bajama,
 quēnabeaja” m̄ua yit̄uoĭasere, gāmerā gotimenane,
 Dios sīgūrene m̄ua t̄uoĭasere gotiroti ñaja. “To bajiro
 yua yisere ĭacđari, ‘Quēnaja’ yiĭaḡūmi Dios” yirāma,
 variquēnarāma. ²³ “Yua bajama ¿Dios ĭ bojabetire
 yirojari yua?” yiboarine ĭna bacđajama, rojose yirā
 yirāma. To bajirone bajiaja. “Dios ĭ bojabetire
 yirā yaja” yiboarine, mani yijama, manire quēne
 rojose ñaroja.

15

“Mani ñaroti rīne t̄uoĭaroti me ñaja”, yire queti

¹ “Cristo yuare ejarēmoḡūmi” yit̄uoĭarā ñaboarine,
 t̄uoĭaḡūirāre, “To bajiro m̄ua bajise quēnabeaja”
 ĭnare yimenane, ĭnare r̄uc̄ub̄uc̄ođaña. M̄ua ñaroti
 rīne t̄uoĭamenane, t̄uoĭaḡūirāre ĭnare ejarēmoroti
 ñaja. ² Mani rācana Cristore ajitir̄anurā, gājerā
 ĭre ajitir̄anurā ñaboarine, t̄uoĭaḡūirā quēne, ĭnare
 ejarēmoroti ñaja, “B̄utob̄usa Cristore ajitir̄an̄ucđari,

bajiro bajiruaroja” ñnare ñ yimasiriarore bajirone yigũ ñnaami Dios’ yimasioato ñna” yigũ, yuare ejarẽmoñumi. ⁹ Jud'io masa rĩ mere ejarẽmogũ vagũ bajiyumi Cristo. Jud'io masa mere quẽne ejarẽmogũ bajiyumi. “Masare Dios ñ ñamaisere masicõari, ñre quẽnaro rũcũbuo variquẽnato jud'io masa, jud'io masa me quẽne” yigũ, vayumi Jesús. To bajisene gotiaja Dios ocare masa ñna ucamasire:

“ ‘Jud'io masa me, yũ rãca mũre yivariquẽnato ñna’ yigũ, varũcũja yũ. Yũ sũorine mũre yirũcũbuocõari, basarũarãma ñna”, yigotiaja Dios ocare masa ñna ucamasire, Cristo ñ jacũre ñ gotirere yiro.

¹⁰ Quẽna gajeye ado bajiro gotiaja Dios ocare masa ñna ucamasire:

“Mũna jud'io masa me, Dios yarã jud'io masa rãca cojo masare bajiro variquẽnarũarãja mũna”, yigotiaja Dios oca.

¹¹ Gajeye quẽne ado bajiro gotiaja ti:

“Jud'io masa, ñna me quẽne, masa jediro ñre rũcũbuo variquẽnarũarãja mũna”, yigotiaja ti.

¹² Isa'ias ñamasir'i quẽne ado bajiro ucamasĩñumi:

“Isa'i jãnami sĩgũ ruyuarũcũmi, jediro masa mũju ñarocũ. Ñre ajitirũnũcõari, ‘Ñ sũorine Diorãca quẽnaro ñnarũgũrũarãja mani’ yirũarãma ñna”, yiuamasĩñumi Isa'ias.

¹³ “Cristo sũorine Diorãca quẽnaro ñnarũgũrũarãja” yitũoĩamasirere manire cõagũ ñagũmi Dios. Ñrene ado bajiro mũare sãnibosaja yũ: “ ‘Mũre ajitirũnrũtuacõari, quẽnaro variquẽnarã, mũ rãca quẽnaro ñnacõa ñnato ñna’ yigũ, ñnare ejarẽmoña. To yicõari, ‘Esp'iritu Santo ñ ejarẽmose

rãca b̄utob̄usa tire masiato ñna' yiḡu, ñnare ejarẽmoña", Diore m̄are yisẽnibosaja yu.

"Diore gotirẽtobosaḡu yu ñarotire Dios ñ cõar'i ñari, m̄are ucacõaḡu yaja", Pablo ñ yire queti

¹⁴ Yu mairã, "Quẽnaro yirã ñarãma ñna. Cristo ocare quẽnaro masirã ñari, quẽnaro gãmerã gotimasierã ñarãma ñna", m̄are yimasiaja yu. ¹⁵ To bajiro m̄a bajisere masiḡu ñaboarine, papera rãca quẽnaro riojo m̄are gotiaja yu. "Tirũm̄ju m̄a ajirere masiritibeticõato" yiḡu, m̄are ucacõaja yu. Dios yure ñamaicõari, ñ ocare gotirẽtobosaḡu yu ñarotire ñ bojacati ñajare, m̄are ucaja yu.

¹⁶ "Jesucristo ñ bajirere jud'io masa mere gotimasiato" yiḡu, yure cõacami Dios. To bajiro ñ yicati ñajare, yu gotimasiosere ajicõari, Cristore ajitirũn̄ama jud'io masa me ñarã. Ñre ajitirũn̄arã ñari, Esp'iritu Santo ñ ejarẽmose rãca "Rojose mana ñaama", Dios ñ yĩarã ñari, ñ yarã ñaama.

¹⁷ To bajiri, "Dios ñ bojasere yiḡu, Jesucristo s̄orine quẽnaro moaja", yivariquẽnaja yu.

¹⁸⁻¹⁹ Jud'io masa mere yu gotimasiojama, yu masune t̄oĩacõari, gotiḡu me yaja. Cristo, ñ ejarẽmose rãca gotimasioaja yu. Tire ajicõari, Cristo ñ ejarẽmose rãca quẽnaro yu yisere ñacõari, to yicõari, Esp'iritu Santo s̄orine ñaĩañamani yu yĩosere ñarã ñari, "Yure ejarẽmor̄uc̄ami Cristo", ñre yit̄oĩas̄ocama ñna. To bajiri, Jerusalén̄j̄ne Cristo ñ bajirere gotis̄ocac̄u, gaje macarire quẽne goticudiḡu r̄ine, Iliria sitaj̄u gotiejocaj̄u yu.

²⁰ "Cristo ñ bajirere gotimasioñamana ñna ñarojure, gotimasioiḡu var̄uc̄aja", yit̄oĩa vadirũḡuc̄aj̄u yu. Gãjerã ñna goticõariarõj̄rema gotimasioiḡu

varuabeticaju yu. ²¹ To bajiro yu bajirotire yiro, ado bajiro gotiyuja, Dios ocare masa ña ucamasire:

“Cristo ñ bajirere masibetiriarã, gotimasio ecoruarãma.

To bajiri, tire ajimasiruarãma”, yigotiyuja ti.

Romaju Pablo ñ varua tuõiare queti

²² To bajiri, Cristo ñ bajirere gotimasioñamana ña ñarojmare gotimasiodigü ñari, mua ture varuaboarine, vabetirügücaju yu maji.

²³ Tirümüjune mua tu varuacõa ñacaju yu. To bajiro bajiruarügücacu ñari, adi sitanare ñare gotimasiojeocõari, mua tujua varua tuõiaja yu yuja.

²⁴ Españaju vacu mware ñarëtoarucuja yu. To bajiri mua rãca yoaro variquënacõa ñaruagu ñaboarine, yoaro mua rãca ñabetirucuja yu, bajigujuma. To bajiboarine mua ejarëmose bojaja yu, España yu ejamasirotire yigu.

²⁵ To bajiro yu bajiroto rïjoro Jerusalénju vacoacu yaja maji, Cristore ajitirünarãre ñare ejarëmoghuacu.

²⁶ Cristore ajitirünarã, Macedonia vãme cuti sitana, Acaya vãme cuti sitana quëne, ado bajiro tuõiañujarã ña: “Jerusalén macana, Cristore ajitirünarã maioro bajirãre gãjoa rãca ñare ejarëmoto mani”, yituoiañujarã ña. To bajiro yituoïariarã, ña ñsirere juacõari, Jerusalén macanare ñsiguacu yaja yu.

²⁷ Ña masune tuõiacõari, “Ñare ejarëmoto mani”, yituoiañujarã ña, jud'io masa me ñaboarine. Jud'io masa suorine, jud'io masa mere, Dios yarã ña ñase ejayuja ti. To bajiri jud'io masare maioro bajirãre ejarëmoroti ñaja. ²⁸ To bajiri Jerusalén macanare gãjoa ñare yu ñsiro bero, Españaju vacu, mware

ĭarĕtoarucĭja yu. ²⁹ “Mua tu yu ejaro, mani ñajediro mani variquĕnarotire cōarucmi Cristo”, yimasiaja yu.

³⁰ Yu mairā, Jesucristore ajitirūnrā ñaja mua. To bajicōari, Esp'iritu Santo suorine gājerāre ĭamairā ñaja. To bajiri yu bajisere tuoĭacōari, Diore yure sēniejarēmoña yaja yu. ³¹ “Judeana Cristo ĭ bajirere yu gotisere ajiterā rojose yure yiroma” yirā, Diore yure sēniejarēmoña. To yicōari, “Jerusalén macana, Cristore ajitirūnrā gājoa yu ĭsirotire variquĕnase rāca boca juato ĭna” yirā, Diore yure sēniejarēmoña. ³² To bajiri Diore yure mua sēniejarēmojama, variquĕnase rāca mua taju ĭagū ejarucĭja yu, Dios ĭ bojajama. Mua taju eja, mua rāca quĕnaro ususājarucĭja yu. ³³ Dios, quĕnaro mua ñarotire muare ejarēmoato ĭ. To bajirone bajiato.

16

Pablo ĭ quĕnaroticōare queti

¹ Febe vāme cutigore mua tu sore cōagū yaja yu. Dios suorine Cristore ajitirūnugō ñaamo so. Cristore ajitirūnrā Cencrea vāme cuti macana rāca Diore moabosarimaso ñaamo so. ² Sone ñaamo jājarā Cristore ajitirūnrāre quĕnaro ejarēmorio. Yure quĕne ejarēmorūgūmo. To bajiri mua tu so ejaro, “Mani ujure ajitirūnugō ñaamo so quĕne” yimasirā ñari, so bojase cōro sore yirēmoña, “Cristore ajitirūnrā ñaja mani” yirā.

³ Yure bajiro Jesucristo ocare gotimasierā ñacana, Prisca, so manaju Aquila, quĕnato ĭna. ⁴ “ĭre mani ejarēmojama, manire quĕne sīarāma” yimasiboarine, yure ĭna sīaborotire yirĕtobosacama

ĭna. To bajiri, “Quēnaro yure yicajm mna”, ĭnare yiucaĉĉaja ym. Ym sĭgũ mere, “Quēnaro yirã yicajm mna”, ĭnare yaja ym. Ym sĭgũ me to bajiro mware yicĉaja ym. Jud'io masa me, tocãrãca macariana Cristore ajitirãnurã quēne, yirũgũama. ⁵ Quēnato Cristore ajitirãnurã Aquila ya vi rējarũgũrã. Quēnato ym maigũ, Epeneto quēne. Ĩ ñaami Asia sitagm Cristore ajitirãnusor'i. ⁶ Mar'ia, quēnato, buto mware ejarēmorio quēne. ⁷ Ym yarã, Andrónico, Junias quēne quēnato. ĭna rãca tubiberiavijm ñacajm ym. ĭna ñacama ym rĭjoro Cristore ajitirãnusoriarã. Cristo ocare ajitirãnurã ĭna cĉarã rētoro quēnaro yicudiyuma ĭna.

⁸ Quēnato ym maigũ Ampliato quēne. Mani mjure ajitirãnugũ ĩ ñajare, ĩre buto maiaja ym. ⁹ Gãji, yure bajiro Cristo ocare gotimasiogũ, Urbano vãme cãtigm, quēnato. To bajicĉari, ym maigũ Estaquis quēne, quēnato. ¹⁰ Apeles quēne, quēnato. Rojose tãmbooarine, Cristore ajitirãnucĉa ñacami. Aristóbulo, to yicĉari ĩ ya viana quēne, quēnato. ¹¹ Ym ym Herodión quēne, quēnato. Mani mjm Cristore ajitirãnurã Narciso ya viana, quēnato. ¹² Trifena, to yicĉari, Trifosa quēne quēnato. Mani mjm Cristore buto moabosarimasa ñaama. Mani maigũ Pérsida quēne, quēnato. So quēne, mani mjm Cristore buto moabosacamo. ¹³ Rufo quēne quēnato. Cristore quēnaro ajitirãnugũ ñacami. Ĩ jaco quēne quēnato. Sone ñacamo, ym jacore bajiro yure maicaco. ¹⁴ To yicĉari, As'incrito, Flegonte, Hermes, Patrobas, Hermas, ĭna rãcana quēne, Cristore ajitirãnurã jediro quēnato. ¹⁵ Filólogo, Julia, Nereo, to yicĉari, ĩ bedeo quēne, quēnato. Olimpás,

to yicōari, ĩna rācana Cristore ajitirānūrā jediro quēnato.

16 Cristo s̄orine cojo masare bajiro bajirā ĩari, quēnaro gāmerā yisēniā, yīñāñā m̄a. Adoana, Cristo ocare ajitirānūrā jediro, m̄are quēnaroticōama ĩna.

17 Ȳ mairā, gajeye ado bajiro m̄are gotimasioaja ȳ: M̄a rācana sīgūri ricati ĩna gotijare, sīgūre bajiro t̄oīamenaja m̄a. Cristo oca m̄a ajiriarore bajiro me bajiaja ĩna yisema. To bajiri ĩnare cāmoticōañā. 18 Mani ̄j̄m̄ Cristo ĩ bojasere yirā me ĩarāma ĩna. ĩna t̄oīarore bajiro yirā ĩari, socarāne quēnaro gotitorāma. To bajiri socase ĩna gotisere ajitirānūrāma, quēnaro t̄oīamasimena.

19 M̄arema, ĩnare bajiro m̄a bajibetijare, “ĩna ̄jarāre quēnaro c̄dirā ñaama”, yama masa, m̄are. To bajiro m̄a bajisere ajivariquēnaja ȳ. To bajiri, quēnase rīne m̄a yisere bojaja ȳ. 20 Quēnaro mani ĩarotire c̄agū ñaami Dios. To bajiro yiḡm̄ ĩari, vātia ̄j̄re ĩre c̄daaboḡre bajiro yiḡm̄c̄mi, “Socarimasa ĩna gotiboasere ajibeticōato ĩna” yiḡm̄. To bajiri, “Quēnaro ĩnare yiya” mani ̄j̄m̄ Jesucristore m̄are yisēnibosaja ȳ.

21 Ȳ baba, Cristo ocare gotimasioagū, Timoteo vāme c̄tigu, m̄are quēnarotiami. Ȳ yarā Lucio, Jasón, Sos̄ipate quēne, m̄are quēnarotiamā.

22 Ȳm̄ Tercio, Pablo ĩ rotirore bajiro adi paperare ucabosagu quēne, mani ̄j̄m̄ Cristore ajitirānūgū ĩari, m̄are quēnarotiaja ȳ.

23 Gayo quēne, m̄are quēnarotiami. ĩ ya vijane ĩacōari, Cristore ajitirānūrā rējarūgūaja. Erasto adi macajure gājoa codebosarimas̄u quēne, m̄are

quēnarotiami. Cristo s̄orine mani ȳu, Cuarto vāme c̄atiḡu quēne, “Quēnato”, m̄are yami.

²⁴ To bajiri, “Quēnaro ĩnare ȳiya”, mani ɛ̄ju Jesu-
cristore m̄are yisēnibosaja ȳu. To bajirone bajiato.

“Diore r̄uc̄b̄uo variquēnato mani”, yire queti

²⁵ Diore r̄uc̄b̄uorā ñari, “Quēnaro yiḡu ñaami. Rētoro masiḡu ñaami”, Diore yir̄uc̄b̄uoroti ñaja. ĩ ocare quēnaro m̄a ajitir̄un̄jama, “Manire ejarēmoḡūmi Cristo” m̄a yit̄uōiarotire cōar̄uc̄m̄i Dios. ĩ ocare gotimasiorūḡūaja ȳu, masa rojose ĩna tām̄uoborotire Cristo ĩ yir̄etobosarere. Tir̄um̄juma ti ũn̄ire gotimasio ecobesuja maji.

²⁶ To bajiboarine, Diore gotir̄etobosariarā ĩna ucamasirere ajicōari, “To bajise bajirotire gotiro yaja”, yimasibesuma. Adir̄um̄irema, “‘Cristo ĩ rijabosare ti ñajare, “Quēnarā ñaama”, manire yīaḡūmi Dios’, masa jediro ȳre yimasiato” yiḡu, ti oca mani ajimasirotire manire cōañumi Dios, adi macar̄uc̄roju ñacōa ñarūḡūḡū.

²⁷ ĩ ñaḡūmi jediro masiḡū. Gāji ĩre bajiro bajiḡu maḡūmi. Jesucristo manire ĩ codese s̄orine ĩre yir̄uc̄b̄uo variquēnacōa ñato mani. To bajirone bajiato.

To cōrone ñaja.

**Dios oca gotirituti
New Testament in Barasana-Eduria
(CO:bsn:Barasana-Eduria)**

copyright © 2010 Wycliffe Bible Translators, Inc.

Language: Barasana-Eduria

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Barasana-Eduria

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

b6661d38-f021-5259-8010-5dec5b9ba28d